

## Htawm Tuh' ri tuil'

<sup>1</sup> Punta Yesu' Hkrit kaw Eun tuh' ri tuil' mhai' ri na' ce nyu lawng ku' kaw hk'aws' kah ri meuh hk'a' nanggal' na' ce, Peucawo' Eun tuh' ri tuil' a ri Yesu' Hkrit Eun. Hawc' ko', Yesu' Eun cus' in'hpom ri na' eun heul' tuh' ri tuil' a ri Yo'han mhai' ri na' eun. <sup>2</sup> Seun' Yo'han pun eun ri nyu leukah' Eun Peucawo' na' mae' leukah' hkam' sa'hki' Eun Yesu' Hkrit na', eun ku' hkam' sa'hki' ka na' ce. <sup>3</sup> Mun' keuting ri peue lip leukah' tamnai aen' a na' ce reu'. Mun' keuting ri peue mhawng' leukah' aen' na hawc' ko' ce seue' a nang hpum' ri na' ce reu'. Kopti yam ka na' kaw a hk'aws' rot hawc'.

*Htawm tem' ri tuil' ri muk kon' Hkrit a' res muk*

<sup>4</sup> Htawm ti ok' aen' na ko', meuh ui' Yo'han,

ui' tem' ri tuil' a ri muk kon' Hkrit a' res muk ut' nang kuing' Asa' na' ce. Kah mun' sin' mae' hk'a' kuit nyawk' kuit sam'ran cumyen' lih neum Peucawo' Cawo' a'yu im' maet'maen', a'yu im' yam pon heul' na' mae' a'yu im' hk'a' nha' hk'a' nanggal' na', mae' lih neum cit' a' res cit' ut' nanggal' tenceo' Eun Peucawo' na', <sup>5</sup> mae' lih neum Yesu' Hkrit Cawo' hkam' sa'hki' kati keutawn' ku' meuh Cawo' tang kuh' im' hk'ai' vang yeum ri nanggal' peue, Eun meuh Cawo' u' peung hk'a' pang hkun' haw' hkam' pang bhen' keute' na' ce gawm' euc' na' kue' ri pe' reu'.

Yesu' Hkrit leumeus' Eun e'. Eun yeuh e' pon map' ri ri nham' ri na'. <sup>6</sup> Eun uin' e' meuh peue kuing' ri, mae' punta kaw e' yeuh mhai' Eun Peucawo' mae' yeuh mhai' Eun Kuing' Eun na', Eun uin' e' meuh peue jhawp' rit.

Kah munhpung' maeé tí'ca ná' kue' ri Heun co'tcu ri reu'.  
Amin.

<sup>7</sup> Keue' reu', buih lih Eun maeé' putum' ná'.

Ngai' ná' a kaw nyu Eun ku ngai'.

Saec' meuh peue sawt' Yesu' Eun ná' ce

maeé' peue ceu ut' pang bhen' keute' ná' ce  
gawm'euc', ce kaw pun ri kleh'klai' kop Heun ri.

A kaw meuh yeuh keutit' neumneum. Amin.

<sup>8</sup> Cawo' Peucawo' lah' Eun, "Meuh ui' Alfa\* maeé' Omega.† A'yu im' Uí' maet'maen' maeé' yam pon heul' ná' maeé' hk'a' nha' hk'a' nanggal' ná'. Uí' meuh Cawo' tí'ca keuting."

*Yo'han nyu eun Kon' ai' peue Eun*

<sup>9</sup> Meuh ui' Yo'han meuh ec'awng' meuh a'mawo pé'. Meuh ku' buih ruim ri hkam' ku' tukhka, buih ruim ri hkam' kuing' Eun Peucawo' maeé' buih ruim ri hkam' ku' yeun' hkam' ná' ce gawm'euc' maeé' pé' tiduih' hk'a'nae Yesu' Hkrit Eun ná'. Kopti sangsawn' ui' leukah' Eun Peucawo' ná' maeé' hkam' ui' sa'hki' lawng Eun Yesu' ná', ui' pun ri hk'awng' ri nang kaw' Patmos' ná'. <sup>10</sup> Hk'a'nae seunyi Eun Peucawo' ná', ui' ut' hk'a'nae Cit' seunga' ná' ui' pun ri mhawng' seng' laws' seun' seng' pi'tae'rae' ná' laws' ka hk'a'kuí' ui' ná'. <sup>11</sup> A lah', "Tem' ku' pun mi ri nyu ná' nang bawl' htawm ná' bu' a ri muk kon' Hkrit a' res muk ná' ce reu'. Ce meuh muk kon' Hkrit E'fe'su', Sameuna', Peugama', Tiyatira, Sadis', Hpi'ladeufia maeé' Laodisia."

<sup>12</sup> Yam hpawt' ui' ri keue' ri cawo' leukah' maeé' ti ná' Eun, ui' pun ri nyu bin' ngawl hk'il' a' res bin'. <sup>13</sup> Nang seuna' ka bin' ngawl awn' ce, ui' pun ri nyu peue ti peue "Eun seun' Kon' ai' peue ná' Eun".‡ Eun cuip' hk'o dal' a lih

\* **1:8** 1:8 Alfa ná' meuh a tu'kleum' ka tu'htawm leukah' Helasa' ná'. † **1:8**

1:8 Omega ná' a meuh tu' tisut' ka tu'htawm leukah' Helasa' ná'. ‡ **1:13**  
1:13 Dayala' 7:13

chui'p' cung Eun na'. Eun mawt sae'caet' hk'il' ri nyawng ri na'. <sup>14</sup> Cing' Eun na' mae' huik' Eun na' a paing seun' kuii' hpong', seun' seudap' ko'. Ngai' Eun na' a seun' kueng ngawl na'. <sup>15</sup> Cung Eun na' a seun' tong lhom' ri nae' meuh leuum' ri nang peung' ri na'. Seng' leukah' Eun na' a seun' seng' leuum' dhim' ri hot' klong' na'. <sup>16</sup> Eun jhawp' seumeueng' a' res meul' hk'a' ti' a'tawm' ri na'. Leungawng lawm la' plak' lawm nyawk' na' a pucti lih neum moeng Eun na' ti hten'. Buh Eun na' a ceng' nyawk' seun' ceng' ka seunyi na'.

<sup>17</sup> Yam pun ui' ri nyu Eun na', ui' cung' kus keunam cung Eun na', ui' seun' peue yeum ko'. Hawc' ko', Eun tang' ti' a'tawm' ri na' hk'a' pang ui'. Eun lah', "Pawlae lhat'. Meuh Ui' yamla na' mae' yam tisut' na'. <sup>18</sup> Ui' meuh ku' a'yu im' na' Eun. Yeum Ui' hawc', daecti keue' reu', suip Ui' ri a'yu im' cot'cu ri. Hk'a' yeum na' mae' kuing' yeum na' Ui' jhawp' pakhkeuca' ka na'.

<sup>19</sup> Kop awn' na, ku' pun mi ri nyu hawc' na' ce, ku' buih meuh maet' maen' na' ce mae' ku' kaw meuh hk'a' nha' hk'a' nanggal' na' ce, tem' a reu'. <sup>20</sup> Ku' vangdoh' rui' sum' lah' ka seumeueng' a' res meul' pun mi ri nyu ri hk'a' ti' a'tawm' Ui' na' mae' bin' ngawl hk'il' a' res bin' na' sum' lah' ka a yeuh keutit', seumeueng' a' res meul' na' meuh a in'hpom ce muk kon' Hkrit a' res muk na', bin' ngawl a' res bin' na' meuh a muk kon' Hkrit a' res muk na' ce.

## 2

### *Htawm tem' ri tuil' ri muk kon' Hkrit E'fe'su'*

<sup>1</sup> Tem' ri tuil' htawm ri in'hpom ce muk kon' Hkrit E'fe'su' na' eun yeuh keutit',

'Cawo' jhawp' seumeueng' a' res meul' hk'a' ti' a'tawm' ri Eun ut' nang seuna' ka bin' ngawl a' res bin' na' Eun

lah' a yeuh keutit', <sup>2</sup> “Yawng Uí' ku' yeuh mi na', hk'a' katcin mi na' mae' hk'a' yeun'hkam mi na'. Uí' yawng hkam' un' pe mi peue rai na' ce. Uí' yawng long mi ri nawk peue lah' ri meuh peue caee Eun Yesu' daecti ce un' meuh na' ce. <sup>3</sup> Uí' yawng pun mi ri yeun'hkam, pun mi ri hkam' ku' tukhka kopti meuh a muis Uí' na', mi un' hpum' lu.

<sup>4</sup> Daecti Uí' kue' ku' kaw tawk mi ti ceu. Tecla pé' hk'a' leumeus'keus kue' pé' nanggal' aen' ce na' hawc'. <sup>5</sup> Mi cí' pe hk'uic' lih a'ngeng na' kuit rot ri ka reu'. Taws' hpum' fuin map' ri tang yeuh ku' tawn yeuh mi nanggal' aen' ce na' reu'. Mi lawn un' taws' hpum' fuin map' ri ko', kaw Uí' lih ri mi, lih hue' ri ti bin' ngawl mi na' hk'ai' vang po ka na'. <sup>6</sup> Daecti mi tup kaw'n' kue' ku' chak' na' ti ceu, mi ces ri kan' yeuh ce muk Ni'hko'las' na'. Uí' ku' ces ri ka yeut.

<sup>7</sup> Peue kue' yhuk' na', leuceng leukah' ku' Cit' seunga' na' lah' ka ri muk kon' Hkrit na' ce reu'. A'nhaw' lawn pe ko', Uí' kaw tuil' ahkvang kaw eun pun ri hk'a' plí' ka kleum' hku' civit im' kue' nang Paradi'su\* Eun Peucawo' na'.”

*Htawm tem' ri tuil' ri muk kon' Hkrit Sameuna'*

<sup>8</sup> Tem' ri tuil' htawm ri in'hpom ce muk kon' Hkrit Sameuna' na' eun yeuh keutit',

‘Cawo' meuh kleum' yamla na' mae' yam tisut' ku' yeum hawc' Eun tang kuh' im' na' Eun lah' a yeuh keutit', <sup>9</sup> “Yawng Uí' ku' tukhka ku' hk'o'tukyak hkam' mi na'. Daecti mi ku kaw'n' meuneum. Uí' ku yawng ku' saesawm' ce mi peue lah' ri meuh peue ceu Yu'da daecti ce un' meuh, ce meuh sa'la vang hk'o' mun' ka Satan na'. <sup>10</sup> Pawlaee lhat' ri ku' tukhka pun mi ri hkam' na'

\* 2:7 2:7 Lu'ka 23:43

ce. Kaw Uí lah' a ri mi, punta seuca' rai na' kaw a long ri nawk mi na', a kaw hk'awng' pé ngon' nang htawng'. Mi kaw pun ri hkam' ku' keunhap' nokneh na' pun kul' seunyi. Mi saec' na' rot htan kaw ri yeum, kati keutawn' reu'. Kaw Uí tuil' cui'maw hk'il' civit im' na' ri mi.

<sup>11</sup> Peue kue' yhuk' na', leuceng leukah' ku' Cit' seunga' na' lah' ka ri muk kon' Hkrit na' ce reu'. A'nhaw' lawn pe ko', eun hkuin' kaw pun ri hkam' ku' sui' ri hk'a' yeum lal' pok ti pok na'."

*Htawm tem' ri tuil' ri muk kon' Hkrit Peugama'*

<sup>12</sup> Tem' ri tuil' htawm ri in'hpom ce muk kon' Hkrit Peugama' na' eun yeuh keutit',

'Cawo' jhawp' leungawng lawm lal' plak' lawm nyawk' na' Eun lah' a yeuh keutit', <sup>13</sup> "Yawng Uí vang ut' mi na'. Meuh a vang u'peung ka Satan na'. A saec' yeuh sa'nhaw' jhawp' mi muis Uí na' keutawn'. Saec' meuh yam Anhti'pas' ku' meuh nang hkam' sa' hki' kati keutawn' Uí na' pun eun ri hkam' toh peue ri nang veng mi vang ut' ka Satan na', mi ri mi hkuin' tecla hk'a' yum' ri Uí na'.

<sup>14</sup> Daecti Uí kue' ku' kaw tawk mi ti ceu. Pé ri ngon', pé jhawp' ku' sangsawn' eun Balam na'. Balam eun sangsawn' Balak' eun heul' cop' peue Ísarela' na' ce yeuh map' ri kah ce hk'a' ku' hk'a' tan ri ruphtu na' maeé' kah ce hkuit' nawng'tang' na'. <sup>15</sup> Seun' awn' na, pé ri ngon', pé jhawp' ku' sangsawn' ce muk Ni'hko'las' na'. <sup>16</sup> Kop awn' na, taws' hpum' fuin map' ri reu'. Mi lawn un' taws' hpum' fuin map' ri ko', un' ling' kaw Uí lih ri mi, Uí na' peueng' suik' ri ce ri leungawng lih hk'ai' moeng Uí na'.

<sup>17</sup> Peue kue' yhuk' na', leuceng leukah' ku' Cit' seunga' na' lah' ka ri muk kon' Hkrit na' ce reu'. A'nhaw' lawn pe

ko', Uí kaw tuil' pli' mana' mo' ri na' mae' seumu paing tem' tu' muis hk'u' ri ka na' ri heun. A lawn un' meuh peue pun seumu awn' a na' eun ko', a'nhaw' hkuin' kaw yawng muis awn' na."'

*Htawm tem' ri tuil' ri muk kon' Hkrit Tiyatira*

<sup>18</sup> Tem' ri tuil' htawm ri in'hpom ce muk kon' Hkrit Tiyatira na' eun yeuh keutit',

'Kon' ai' Eun Peucawo' Cawo' ngai' Eun a seun' kueng ngawl, cung Eun a seun' tong lhom' ri naee meuh leum' ri nang peung' ri na' Eun lah' a yeuh keutit', <sup>19</sup>“Yawng Uí' ku' yeuh mi na', hk'a' leumeus' keus mi na', hk'a' yum' mi na', hk'a' yeuh mi mhai' na' mae' hk'a' yeun' hkam mi na'. Uí' yawng, maet' maen' yeuh mi ceu nang aen' ce lheu' hk'ai' nanggal' aen' na.

<sup>20</sup> Daecti Uí' kue' ku' kaw tawk mi ti ceu. Tae' mi Yesebela' ku' lah' meun ri meuh beun' suip leukah' Eun Peucawo' na' ka. Ku' sangsawn' ka na' a yeuh mhai' Uí' na' ce kleuc' hk'a' ri. Ka kah ce hkuit' nawng'tang' mae' kah ce hk'a' ku' hk'a' tan ri ruphtu na'. <sup>21</sup> Uí' saec' tuil' yam kaw ka taws' hpum' fuin map' ri hk'ai' hk'a' hkuit' nawng'tang' ka na' ko', daecti ka un' yeuh a. <sup>22</sup> Kop awn' na, Uí' kaw nyon ri seue' ka nang vang it' tikhka nyhap' na'. Saec' meuh peue len'cu mae' beun' awn' ka na' ce, ce lawn un' nang taws' hpum' fuin map' ri hk'ai' hk'a' a'yu im' ka beun' awn' na ko', Uí' ku' kaw tuil' ce hkam' ku' tikhka nyhap' nyawk' na'. <sup>23</sup> Uí' kaw toh kon' ka beun' awn' ce. Yeuh keutit' na', muk kon' Hkrit na' ce gawm'euc' ce kaw yawng meuh Uí' Cawo' cang yawng ku' kuit' peue nang hpum' ri na'. Uí' kaw top' kun ka na' hot' ku' yeuh pe' na' ti peue hawc' ti peue. <sup>24</sup> Maet' maen', Uí' lah' a ri peue seubu ut' nang veng Tiyatira ku' un' jhawp' ku' sangsawn' ka beun' awn' a na'

mae' peue un' pun ri rin ku' lah' peue meuh vangdoh' rui' ka Satan na' ce yeuh keutit', (Ui' hkuin' kaw laee po beus seubu hk'a' pang pe'.) <sup>25</sup> jhawp' yawo ku' kue' pe' na' meulamlam ri rot ti yam ing' rot Ui' na' reu'.

<sup>26</sup> A'nhaw' lawn pe mae' yeuh ku' sum' kah Ui' eun yeuh na' rot tisut' ka ko', Ui' kaw tuil' ti' ca u'peung peue ceu gawm' euc' na' ri heun seun' pun Ui' ti' ca u'peung neum Kuing' Ui' Eun na'.

<sup>27</sup> Eun kaw u'peung ce ri hku'ji lhec' na'.

Eun kaw peum' ce nyai' meuh glawk' ri<sup>†</sup> seun' keutong' keute' na'. <sup>28</sup> Ui' ku' kaw tuil' seumeueng' keuting peunngup cawo na' ri heun. <sup>29</sup> Peue kue' yhuk' na', leuceng leukah' ku' Cit' seunga' na' lah' ka ri muk kon' Hkrit na' ce reu'." ' "

### 3

#### *Htawm tem' ri tuil' ri muk kon' Hkrit Sadis'*

<sup>1</sup> Tem' ri tuil' htawm ri in'hpom ce muk kon' Hkrit Sadis' na' eun yeuh keutit',

'Cawo' Jhawp' cit' Eun Peucawo' a' res cit' na' mae' seumeueng' a' res meul' na' Eun lah' a yeuh keutit', "Yawng Ui' ku' yeuh mi na'. Peue saec' na' suk' seun' a'yu im' mi na' ko', daecti yeum mi hawc'. <sup>2</sup> Kuh' reu', hk'a' yum' kawn' vang mi a kaw hk'aws' yeum na' tuil' kaw' reng ka reu'. Kopti kan' yeuh mi na' un' nang hit' a ri hpum' Eun Peucawo' Ui' na'. <sup>3</sup> Kop awn' na, kuit rot ti ku' pun mi ri rap ri ti na' mae' ku' pun mi ri mhawng' na' reu'. Hot' ri yeuh a, taws' hpum' fuin map' ri reu'. Daecti mi lawn un' kuh' ko', kaw Ui' lih ri mi seun' peue con' ko'. Mi hkuin' kaw yawng kaw Ui' lih ri mi yamnhaw'.

<sup>†</sup> 2:27 2:27 Suk' seun' 2:9

<sup>4</sup> Daecti nang veng Sadi's na' kaw'n kue' mi nang un' yeuh hk'eung ri hk'aw'jeuk ngon'. Ce kaw cuip' hk'eung paing ce na' long hk'a' mae' Ui', kopti kuing' ce ri yeuh keutit' na'. <sup>5</sup> A'nhaw' lawn pe ko', eun kaw pun ri cuip' hk'eung paing seun' peue awn' ce yeut. Ui' hkuin' kaw duing juit' ri tec muis eun nang htawm civit im' na', daecti Ui' kaw htawhkam eun nanggal' Eun Kuiing' Ui' na' mae' nanggal' ce in'hpom Eun na'. <sup>6</sup> Peue kue' yhuk' na' leuceng leukah' ku' Cit' seunga' na' lah' ka ri muk kon' Hkrit na' ce reu'."'

*Htawm tem' ri tuil' ri muk kon' Hkrit Hpi'ladeufia*

<sup>7</sup> Tem' ri tuil' htawm ri in'hpom ce muk kon' Hkrit Hpi'ladeufia na' eun yeuh keutit',

'Cawo' seunga' chak' leupaws seumeu' ku' jhawp' pakhkeuca' eun Davit' na' Eun, ku' tah' Eun na' a'nhaw' hkuin' cang sawng' a, ku' sawng' Eun na' a'nhaw' hkuin' cang tah' a na' Eun lah' a yeuh keutit', <sup>8</sup> "Yawng Ui' ku' yeuh mi na'. Keue' reu', tah' Ui' leuva' na' nanggal' mi hawc'. Leuva' awn' na' a'nhaw' hkuin' cang sawng' a. Yawng Ui' mi saec' kaw'l'reng kloe, daecti mi hot' ri yeuh ku' lah' Ui' na' mae' un' tecla muis Ui' na'. <sup>9</sup> Kaw Ui' yeuh peue ku' meuh sa'la vang hk'o' mun' ka Satan na' ce mae' peue ku' lah' ri meuh peue ceu Yu'da daecti ce un' meuh, ce meuh peue chi'lai na' ce ing' cung'kus keunam cung' mi na'. Yeuh keutit' na', ce kaw pun ri yawng leumeus' Ui' mi. <sup>10</sup> Kopti yeun'hkam mi ri hot' leukah' tuil' Ui' na', yam ku' long ri nawk na' punta kaw a long ri nawk peue ut' pang bhen' keute' na' ce a rot pang bhen' keute' na' ku' duih' na', Ui' ku' kaw yeuh mi lawtpon hk'ai' cu ka na'.

<sup>11</sup> Un' ling' kaw Ui' lih ri mi. Punta kaw peue un' cang rim' ri ti cui' maw hk'il' mi na' pun, jhawp' ku' kue' mi na'

meulamlam ri reu'. <sup>12</sup> A'nhaw' lawn pe ko', kaw Ui' tang' eun meuh kleum' rawng' ka nya hk'o' mun' keuting Eun Peucawo' Ui' na' ti lhem'. Eun hkuin' kaw laee duing pucti heul' hk'ai' nya hk'o' mun' keuting na'. Ui' kaw tawk' muis Eun Peucawo' Ui' na' mae' muis ka veng hk'u' Eun Peucawo' Ui' na' hk'a' pang eun na'. Veng awn' a meuh veng Yeru' salaem hk'u' ku' Peucawo' Ui' buih bu' Eun lih neum kuing' pang mao' na'. Ui' ku kaw tawk' muis hk'u' ri na' hk'a' pang eun yeut. <sup>13</sup> Peue kue' yhuk' na' pe', leuceng leukah' ku' Cit' seunga' na' lah' ka ri muk kon' Hkrit na' ce reu'." '

*Htawm tem' ri tuil' ri muk kon' Hkrit Laodisia*

<sup>14</sup> Tem' ri tuil' htawm ri in'hpom ce muk kon' Hkrit Laodisia na' eun yeuh keutit',

'Cawo' Amin\* ku' meuh Cawo' hkam' sa'hki' kati keutawn' leupaws seumeu' ku' u'peung ku' hpanpleng' Eun Peucawo' na' gawm' euc' na' Eun lah' a yeuh keutit', <sup>15</sup> "Yawng ui' ku' yeuh mi na'. Mi hkuin' kuc', hkuin' seucet. Sum' kah Ui' mi kaw kuc' mi na' sae' kuc', kaw seucet mi na' sae' seucet. <sup>16</sup> Kopti seueul' mi, mi hkuin' kuc' hkuin' seucet, Ui' kaw htueng' ri tec mi hk'ai' moeng ri na'." <sup>17</sup> Mi lah', "Meuneum ui', ui' pun hk'il' leumuil heun' nyawk', ui' hkuin' kaw laee lo' keunhaw' bae." Daecti mi un' yawng tu' ri na' meuh a ku' tukyak, hk'o' tukyak, ngai' lec' mae' meuh tu' seurak' ri. <sup>18</sup> Kaw Ui' tuil' kamkuit mi, punta kaw mi meuneum, kaw mi leuvaee hk'o' paing cuip' a kang' ut' gung' gang' seurak' hk'o' kaic mi na', mae' kaw mi leuvaee bai' pok a ri

\* **3:14** 3:14 "Amin" na' meuh a leukah' Hebrae'. Vangdoh' ka na' a lah', "meuh a neum, a keutawn". A ku meuh muis seubu Eun Yesu' Hkrit na' ti muis.

ngai' ri na' mi na' cang nyu, ing' leuvae hk'il' lhom' ri seungá' chak' ri ngawl na' ri Uí' reu'.

<sup>19</sup> Kaw Uí' ta'faet' sangsawn' ram ri peue leumeus' Uí' na' ce. Kop awn' na, tuin'tung hpum' huk' taws' hpum' fuin map' ri reu'. <sup>20</sup> Keue' reu', cawng Uí' keunam leuva' na', Uí' toe' a. A'nhaw' lawn mhawng' seng' Uí' na' tah' leuva' na' ko', Uí' kaw ing' lec ri hk'asom' maeé' heun. Eun ku kaw hk'asom' maeé' Uí' tiduih'.

<sup>21</sup> A'nhaw' lawn pe ko', Uí' kaw tuil' ahkvang kaw eun mok' maeé' Uí' pang tenceo' Uí' na' seun' pe Uí', Uí' pun ri mok' maeé' A'kuiing' Uí' Eun pang tenceo' Eun na' ko'. <sup>22</sup> Peue kue' yhuk' na' pe', leuceng leukah' ku' Cit' seungá' na' lah' ka ri muk kon' Hkrit na' ce reu'."

## 4

### *Tenceo' ka kuing' pang mao'*

<sup>1</sup> Hawc' awn' na, uí' keue', uí' nyu leuva' ka kuing' pang mao' na' dah' ka nanggal' uí' na'. Seng' a seun' seng' pi'tae'rae' ku' pun uí' ri mhawng' nanggal' na' a lah' a ri uí', "Huk' maen' reu'. Kaw Uí' tuil' mi nyu ku' kaw kah ri meuh hk'a' nanggal' na'." <sup>2</sup> Uí' keulawn' ut' hk'a'nae' Cit' seungá' na', tenceo' ka kuing' pang mao' na' a ut' nanggal' uí' na', a kue' peue mok' hk'a'pang ka ti peue. <sup>3</sup> Ku' mok' awn' Eun ceng' seun' ceng' ka seumu saeng' na'. Ceng' peuyongtong seun' seumu seng' seungal lawng na' a vong ri rop tenceo' awn' na. <sup>4</sup> Keunam ka tenceo' awn' na rop a kue' ten lal'kul' pun' ten. Nang kawt lal'kul' pun' peue na' ce mok' pang ten awn' na. Ce cuip' hk'eung paing, ce cuip' cui'maw hk'il' pang cing' ri na'. <sup>5</sup> Ceng' ka cak'cal' yhapyhap na' maeé' seng' neumhk'i ruingruing na' a lih neum tenceo' awn' na. Nanggal' ka tenceo' awn' na, a kue' bin' ngawl ceng' ruingruing a' res bin'. A meuh cit' Eun Peucawo' a' res cit' na'. <sup>6</sup> Nanggal' ka tenceo' na', a ku' kue'

ku' seun' mha'seumut' ceo' seungawm seun' bles' ceo' na' ti ceu. Keunam nang ngon' ka tenceo' na' rop, a kue' ku' a'yu im' kue' ngai' hk'a'kui' hk'a'kal' ri rop pun' tu'. <sup>7</sup> Ku' nanggal' ti tu' na' a seun' leuvai sangsi'. Lal' tu' ti tu' na' a seun' a'moe. Loe' tu' ti tu' na' a buh seun' peue. Pun' tu' ti tu' na' a seun' klang' peul' eo' ri na'. <sup>8</sup> Ku' a'yu im' pun' tu' awn' na ku tu' ka a kue' hk'ec' les hk'ec'. A kue' ngai' hk'awp' tu' ri na', saec' meuh ruim hk'ec' ka na' a ku kue' ngai'. Gawm' sum' gawm' seunyi a un' laee keului' ri, a klawng ri lah' a yeuh keutit',

“Seunga' chak', seunga' chak', seunga' chak'.

Seunga' chak' na' meuh Eun Cawo' Peucawo' ti'ca keuting Cawo' a'yu im' yam pon heul', a'yu im' maet' maen' mae' Cawo' kaw lih hk'a' nha' hk'a' nanggal' na' Eun.”

<sup>9</sup> Yam ku' a'yu im' pun' tu' awn' lah' a leukah' suk'seun', leukah' tuil' munhpung' mae' leukah' mun' keuting ri Cawo' mok' pang tenceo' Cawo' a'yu im' cot'cu na' Eun ku pok na', <sup>10</sup> nang kawt lal'kul' pun' peue na' ce ku seukluin ri nghup' ri ri Cawo' mok' pang tenceo' na' Eun. Ce fae' Cawo' a'yu im' cot'cu na' Eun. Ce hpuic' ri uin' cui'maw hk'il' ri na' nanggal' ka tenceo' na'. Hawc' ko', ce lah',

<sup>11</sup> “O', Peucawo', Peucawo' ye, kuing' Mi ri pun munhpung',

hk'a' hkopyawm' na' mae' ti'ca na',  
kopti hpanpleng' Mi ku ceu gawm'euc' na'  
mae' kopti meuh ka alo Mi na',  
ceu nang aen' ce pun ri hpanpleng' ri, pun ri keut'  
kue'.”

## 5

### *Bawl' htawm mae' Kon'jung'*

<sup>1</sup> Hawc' awn' na, ui' nyu bawl' htawm ri hk'a' ti' a'tawm' Eun ku' mok' pang tenceo' na'. Bawl' htawm awn' a tem'

ri gawm' lal' plak'. A tawk' ri glhuip ri ri ta'ra' a' res ta'ra'.  
<sup>2</sup>Hawc' ko', uí pun ri nyu in'hpom tí ca keuting ná klawng eun ri lah' seng' laws'. Eun lah', "A'nhaw' cí kaw kuing' ri toh' ta'ra' ná maeé' glas bawl' htawm aen' na?"  
<sup>3</sup>Daecti peue ut' kuing' pang mao', ut' pang bhen' keute' maeé' peue ut' hk'a'ruim ka bhen' keute' ná, a hkuin' kue' nang kaw cang glas ri nawk hk'a'naee ka bawl' htawm ná saec' ti peue.  
<sup>4</sup>Kopti un' kue' a nang kaw kuing' ri glas ri nawk hk'a'naee ka bawl' htawm ná, uí sae'caee' yam ri.  
<sup>5</sup>Hawc' ka ná, hk'a'naee muk ce nang kawt awn' ce ti peue eun lah' a ri uí, "Pawlaee yam. Keue' reu', leuvai sangsi' ce peue ceucat Yu'dah kú meuh a'ta' keuting eun Davit' ná pe Eun hawc'. Eun cang glas bawl' htawm ná maeé' cang toh' ta'ra' a' res ta'ra' ná."

<sup>6</sup>Hawc' ka ná, uí pun ri nyu Kon'yung' kú seun' sak toh ri hawc' ná cawng Eun nang ngon' ka tenceo' ná. Kú a'yu im' pun' tú ná maeé' muk nang kawt ná ce rop Eun. Eun kue' reung' a' res reung' maeé' ngai' a' res ngai'. Ngai' a' res ngai' ná a meuh cit' a' res Cit' Eun Peucawo' Cawo' cus' Eun heul' pang bhen' keute' ná ku duih' ka ná.  
<sup>7</sup>Kon'yung' ná Eun ing' ti bawl' htawm ut' ri hk'a' tí a'tawm' Eun kú mok' pang tenceo' ná.  
<sup>8</sup>Hawc' ti Eun bawl' htawm ná, kú a'yu im' pun' tú ná maeé' nang kawt lal'kul' pun' peue ná ce nghup' ri nanggal' Eun Kon'yung' ná. Ce jang' ting' maeé' paen' hk'il' seuglong' kue' ten' tú hom' nuk ná ku peue ri. Ten' tú hom' ná a meuh seng' hk'o' mun' ce peue Eun Peucawo' ná.  
<sup>9</sup>Ce lah' seng' cai hk'u' ná. Ce lah',

"Kuing' Mi ri rap ri ti bawl' htawm ná

maee' toh' ta'ra' ná maeé' glas htawm ná,

kopti pun Mi ri hkam' toh' peue ri hawc'.

Mi leuvaee peue gawm'euc' ná peue

neum peue ceu ku ceu, leukah' ku ceu, ceucat ku ceu

maee' peue kuing' ku kuing' ná peue hk'ai' nham'

ri ná ap ce ri Peucawó Eun hawc'.

<sup>10</sup> Mi yeuh ce meuh peue kuing' maeé' peue jhawp' rit yeuh mhai' Eun Peucawó e' ná hawc'.  
Ce kaw u'peung bhen' keute' ná."

<sup>11</sup> Hawc' ka ná uí' keue', uí' pun ri mhawng' seng' ce in'hpom hk'o' saen' hk'o' lan ri un' lae euc' mhin' ri ná ce. Ce rop tenceo' ná maeé' ku' áyu im' pun' tu' ná maeé' muk nang kawt ná ce. <sup>12</sup> Ce cai laws' lah',  
"Kon'jung' pun ri hkam' toh ri ná,  
kuing' Eun ri pun tí'ca, vahtu' hk'il' leumuil, cú'yi,  
kaw'reng, hk'a' hkopyawm',  
munhpung' maeé' hk'a' suk'seun' ná."

<sup>13</sup> Hawc' ka ná, uí' pun ri mhawng' seng' ka ku' áyu im' kuing' pang maó', pang bhen' keute', hk'a' ruim bhen' keute' ná maeé' nang mha'seumut' ná ku ceu. A lah',  
"Kah hk'a' suk'seun', hk'a' hkopyawm', munhpung' ná maeé' tí'ca ná  
kue' ri Cawó mok' pang tenceo' ná Eun maeé' Kon'jung' ná Eun  
cot'cu ri reu'."

<sup>14</sup> Ku' áyu im' pun' tu' ná a lah', "Amin." Muk nang kawt ná ce nghup' ri faeé'.

## 6

### *Tá'ra' á' res tá'ra'*

<sup>1</sup> Tá'ra' á' res tá'ra' ná yam Kon'jung' ná toh' Eun ri glas tá'ra' nambat keuhti ná, uí' keue' ri ka. Hawc' ko', uí' pun ri mhawng' seng' klawng ka ku' áyu im' pun' tu' ti tu' ná klawng ka seng' seun' seng' neumhk'i ná. A lah', "Ing' reu'." <sup>2</sup> Uí' keue', uí' nyu rawng paing nanggal' ri ná ti tu'. Cawó pawk ka ná eun jang' kong' htanu. Eun pun cui'maw hk'il' ná. Hawc' ko', eun pawk rawng ná pucti

heul' seun' meuh eun nang peung' suik' pe kaw heul' peung' ri ti suik' ko'.

<sup>3</sup> Yam Kon'yung' na' toh' Eun ri glas ta'ra' nambat leual' na', uí pun ri mhawng' ku' a'yu im' lah' tu' ti tu' na' lah' ka, "Ing' reu'." <sup>4</sup> Hawc' ko', rawng seubu ti tu' na' a pucti lih. A meuh rawng seurak' seun' ngawl na'. Cawo' pawk ka na' eun pun tí'ca kaw ti hk'a' kuit nyawk' kuit sam'ran cumyen' na' pucti lih hk'ai' bhen' keute' na', yeuh peue toh puri. Eun pun leungawng keuting ti hten'.

<sup>5</sup> Yam Kon'yung' na' toh' Eun ri glas ta'ra' nambat leuoe' na', uí pun ri mhawng' ku' a'yu im' loe' tu' ti tu' na' lah' ka, "Ing' reu'." Uí keue', uí nyu rawng lawng nanggal' ri na' ti tu'. Cawo' pawk ka na' eun jang' jeum nang tí' ri na'. <sup>6</sup> Hawc' ko', uí pun ri mhawng' seng' a seun' lih a neum ku' a'yu im' pun' tu' na'. A lah', "Hk'a' nanggal' ka heul' na' kaw a kue' ut' ngeup', ngho' ti pawn na' kaw a caw ngos reng ti seunyi.\* Hkawocung' loe' pawn na' kaw a caw ngos reng ti seunyi. Daecti pawlaee yeuh lamawn na' mae' leuum' plí' bui na' lu."

<sup>7</sup> Yam Kon'yung' na' toh' Eun ri glas ta'ra' nambat pun' na', uí pun ri mhawng' ku' a'yu im' pun' tu' ti tu' na' lah' ka, "Ing' reu'." <sup>8</sup> Uí keue', uí nyu rawng leunga nanggal' ri na' ti tu'. Cawo' pawk ka na' eun muis Hk'a' Yeum. Kuing' yeum na' eun hot' ri tuihtuih eun ing'. Ka pun tí'ca kaw toh peue bhen' keute' na' peue pun' pun ti pun na' ri leungawng, ri ku' ut' ngeup' keuting, ri peuyhat a'nga na' mae' ri sat' rai ka pang bhen' keute' na'.

<sup>9</sup> Yam toh' Eun ri glas ta'ra' nambat hpawn' na', hk'a'ruim ka vang dum ri tan ku' tan na', uí pun ri nyu civit ce peue ku' toh peue ce kop meuh a leukah' Eun Peucawo' na' mae' sa'hki' hkam' ce na'. <sup>10</sup> Ce klawng ri

---

\* **6:6** 6:6 "ngos reng ti seunyi" na', leukah' Helasa' ka a lah', "ti denarian".

lah' seng' laws' lah', "Cawo' keuting hk'a pang gawm'euc', seunga' chak' leupaws seumeu' Mi. Kaw Mi taws' a mu ri peue ut' pang bhen' keute' na' peue mae' kaw Mi top' ku' toh ye na' ce, a ci' kawn' kaw ling' a neng?" <sup>11</sup> Hawc' ko', ce pun hk'o dal' paing na' hot' peue ri ti ri cum. Peucawo' Eun lah' a ri ce, "Puing ko' a rot ti yam ca'lang' ce peue yeuh mhai' na' mae' ec'awng' ce ku' toh peue ce seun' pe' ri na' htonnuk ka."

<sup>12</sup> Yam Kon'yung' na' toh' Eun ri glas ta'ra' nambat les na', ui' keue'. Ui' pun ri nyu in'san' keuting ka nyawk'. Seunyi na' a duim'lawng seun' htong'tai' keusang' maeo lawng na' ko', a'chi' hk'eng na' a seun' nham' na' ko', <sup>13</sup> seumeueng' pang mao' na' a hk'ui'c' pang bhen' keute' na' seun' pli' keutuic' seukawk rum' hk'ui'c' hk'ai' kleum' ri yam guil' puing' ka na' ko', <sup>14</sup> mao' na' a bawl' ri seun' bawl' htawm na' ko', gong na' ku meul' kaw' na' ku duih' a pun ri sat ri hk'ai' vang ut' ri na'.

<sup>15</sup> Hawc' ko', hkun'haw' hkam' pang bhen' keute', hkun'-cawo', po' suik', peue meuneum, peue ti'ca keuting, peue meuh mhai' mae' peue un' meuh mhai' na' ce gawm'euc' ce eo' mo' ri nang keutui' htam mae' nang seuna' ka seumu pang gong na'. <sup>16</sup> Ce klawng ri lah' a ri gong na' mae' seumu na', "Ruik' ghuim' ye, mo' ye hk'ai' buh Eun ku' mok' pang tenceo' na' mae' hk'ai' ku' seungeueng' Eun Kon'yung' na' reu'. <sup>17</sup> Kopti rot a ri seunyi seungeueng' nyawk' Ka Cawo' lal' peue na' hawc'. A'nhaw' ci' kaw hkam' a pun?"

## 7

### *Peue 144,000 peue pun ri tawk' ta'ra'*

<sup>1</sup> Hawc' awn' na, ui' pun ri nyu in'hpom pun' peue ce cawng hot' hon' ka bhen' keute' pun' hon' na'. Ce jhawp' guil' pun' hon' na'. Ce un' tuil' a puing' bhen' keute',

mha'seumut' maeé kleum' hku' na' ce saec' ti kleum'.  
<sup>2</sup> Hawc' ko', uí pun ri nyu in'hpom seubu puc eun ri lih neum hk'a'lih seunyi na' ti peue. Eun jhawp' ta'ra' Eun Peucawo' Cawo' a'yu im' na'. Eun klawng ri lah' laws' a ri in'hpom pun' peue ku' pun tí'ca kaw yeuh ku' lulaic ri bhen' keute' na' maeé mha'seumut' na' ce,<sup>3</sup> “Cu yam un' nang tawk' uí ta'ra' ri rel' ce mhai' Eun Peucawo' ye na' ce na', paw nang yeuh ku' lulaic ri bhen' keute', mha'seumut' na' maeé kleum' hku' na' ce.”<sup>4</sup> Hawc' ko', uí pun ri mhawng' peue pun ri tawk' ta'ra' na' kue' ce 144,000 peue. Ce ing' neum peue ceu Ísarela' ku ceu na' ce,

<sup>5</sup> neum ceucat Yu'dah 12,000 peue,  
 neum ceucat Ru'ben 12,000 peue,  
 neum ceucat Ga' 12,000 peue,

<sup>6</sup> neum ceucat Acheu 12,000 peue,  
 neum ceucat Natalí 12,000 peue,  
 neum ceucat Manase 12,000 peue,

<sup>7</sup> neum ceucat Síme'on 12,000 peue,  
 neum ceucat Levi' 12,000 peue,  
 neum ceucat Ísahka 12,000 peue,

<sup>8</sup> neum ceucat Yebulun 12,000 peue,  
 neum ceucat Yo'saep 12,000 peue,  
 neum ceucat Benyamin 12,000 peue.

*Peue cuip' hk'o dal' paing muk heun'*

<sup>9</sup> Hawc' awn' na, uí keue', nanggal' uí na' a kue' peue cum heun' un' laee euc' mhin' ce. Ce ing' neum kuing' na' ku kuing', neum peue ceu na' ku ceu, neum ceucat na' ku ceucat maeé neum leukah' na' ku ceu. Ce cawng nanggal' ka tenceo' maeé Kon'ying' na'. Ce cuip' hk'o dal' paing. Ce jang' kan lha' ka hkeung' na'.<sup>10</sup> Ce klawng ri lah' seng' laws',  
 “Hk'a' htut na' lih a neum Peucawo' e'

Cawo' mok' pang tenceo' na' Eun  
maee' neum Kon'yung' na' Eun."

<sup>11</sup> Tenceo' na' maee' nang kawt na' ce maee' ku' a'yu im'  
pun' tu' na', in'hpom na' ce cawng ri rop a gawm'euc' ri.  
Ce seukluin ri nghup' buh ri na' nanggal' ka tenceo' na'.  
Ce faee' Peucawo' Eun. <sup>12</sup> Ce lah',

"Amin,  
kah leukah' suk'seun' na', munhpung' na',  
peuyha' cu'yi na', leukah' mun' keuting na', hk'a'yumyam'  
na',  
ti'ca na' maee' kaw'l'reng keuting na'  
kue' ri Peucawo' e' na' Eun cot'cu ri reu'.  
Amin."

<sup>13</sup> Hawc' ko', nang kawt na' eun mhaing' ui' ti peue,  
"Peue cuip' hk'o dal' paing aen' ce ci' meuh a'nhaw', ce  
ci' ing' neum tawngnhaw'?"

<sup>14</sup> Ui' top' a, "Cawo', yawng mi a." Eun tang lah', "Peue  
aen' meuh ce peue ing' neum vang tukhka keuting ri. Ce  
pun ri saic' hk'o dal' ri na' seungawm paing nang nham'  
Eun Kon'yung' na' hawc'. <sup>15</sup> Kop awn' na,  
ce ut' nanggal' tenceo' Eun Peucawo' na'.

Ce yeuh mhai' Eun gawm' sum' gawm' seunyi  
hk'a'naee nya hk'o' mun' Eun na'.  
Cawo' mok' pang tenceo' na' Eun kaw u'peung hk'a'pang  
ce na'.

<sup>16</sup> Ce hkuin' kaw laee sum' som' bae,  
hkuin' kaw laee sum' nyui leuum' bae.

Kuc' reng na' maee' ha' ron na'  
ce hkuin' kaw laee pun ri hkam' a bae.

<sup>17</sup> Kopti Kon'yung' ut' nang ngon' ka tenceo' na',  
kaw Eun meuh Cawo' go' ce. Eun kaw va ce heul' ri  
keutui' leuum' civit im' na'.  
Peucawo' Eun kaw ot' ri tec leuum' ngai' lih neum ngai' ce  
na' ku jam ka."

## 8

*Ta'ra' nambat a' res mae' keutong' hk'il'*

<sup>1</sup> Yam Kon' yung' na' toh' Eun ri glas ta' ra' nambat a' res na', kuing' pang mao' na' a dit' ti yen' hk' ao ri ti hk' vai' nali.

<sup>2</sup> Ui' pun ri nyu in' hpom a' res peue na' cawng ce nanggal' Eun Peucawo'. Ce rap ri ti pi' tae' rae' a' res deul na'.

<sup>3</sup> In' hpom seubu na' eun ti keutong' hk' il' na' eun ing' cawng keunam vang dum ri tan ku' tan na'. Punta kaw eun dum ri tan ku' tan na' mae' leukah' hk' o' mun' ce peue Eun Peucawo' na' tiduih' nang vang dum ri tan meuh hk' il' nanggal' ka tenceo' na', eun pun ku' hom' na' heun'.

<sup>4</sup> Tu' ai' ka ku' hom' lih hk' ai' ti' eun in' hpom na' mae' leukah' hk' o' mun' ce peue Eun Peucawo' na' a huk' tiduih' nanggal' Eun Peucawo' na'. <sup>5</sup> Hawc' ka na', in' hpom awn' eun ti ri seue' ngawl ka vang dum ri tan na' hk' a' nae' keutong' na'. Hawc' ko', eun nyon a lih hk' a' pang ka bhen' keute' na'. A yeuh a neumhk' i reng, seng' ruingruing, cak' cal' ceng' yhap yhap mae' a in' san'.

*Pi' tae' rae' a' res deul*

<sup>6</sup> Hawc' ko', in' hpom a' res peue kue' pi' tae' rae' a' res deul na' ce rangraen ri kaw puing' pi' tae' rae' ri na'.

<sup>7</sup> Yam in' hpom nanggal' ti peue na' puing' eun pi' tae' rae' ri na', a' hk' el' mae' ngawl hkawo' nham' na' a nyon ri lih hk' uic' pang bhen' keute' na'. Bhen' keute' na' loe' pun ti pun a pun ri ha', kleum' hku' na' loe' pun ti pun a pun ri ha', rip seungal na' a pun ri ha' gawm' euc' ka.

<sup>8</sup> Yam in' hpom lal' peue ti peue na' puing' eun pi' tae' rae' ri na', ku' ngawl ha' ka a seun' yawo gong keuting na' a nyon ri lih hk' uic' nang mha' seumut' na'. Mha' seumut' na' loe' pun ti pun a keut' ri meuh nham'. <sup>9</sup> Ku' a' yu im' ut'

nang mha'seumut' na' loe' pun ti pun a pun ri yeum, reu na' loe' pun ti pun a lulaic heul'.

<sup>10</sup> Yam in'hpom loe' peue ti peue na' puing' eun pi'tae'rae' ri na', seumeueng' keuting ha' reung seun' bin' ngawl na' a hk'ui'c' lih neum pang mao', a lih hk'ui'c' nang klong' loe' pun ti pun na' mae' keutui' leuum' na' ce.

<sup>11</sup> Seumeueng' awn' a muis "Hku'sawng". A yeuh leuum' na' sawng' loe' pun ti pun. Kopti leuum' na' keut' a ri meuh leuum' sawng' na', peue nyui a na' peue yeum heun'.

<sup>12</sup> Yam in'hpom pun' peue ti peue na' puing' eun pi'tae'rae' ri na', seunyi, a'chi' mae' seumeueng' na' ce lulaic heul' loe' pun ti pun. A yeuh ku' ceng' ka peunnyi mae' peunsum' na' duim'lawng loe' pun ti pun.

<sup>13</sup> Yam keue' ui' na', ui' pun ri nyu klang' keuting na' peul' a eo' nang ngon' ka mao' na'. A klawng ri lah' seng' laws', "Peue bhen' keute' na' pe', kaw pe' pun ri hkam' hk'a' jha' na', hk'a' jha' na', hk'a' jha' na', kopti seng' ka pi'tae'rae' ce in'hpom loe' peue na' kaw'n' kaw a ing' na'."

## 9

<sup>1</sup> Yam in'hpom hpawn' peue ti peue na' puing' eun pi'tae'rae' ri na', ui' pun ri nyu seumeueng' hk'ui'c' lih neum pang mao' na' lih a pang bhen' keute' ti meul'. Seumeueng' awn' a pun pakhkeuca' kaw tah' keutong'nyarok rui' na'. <sup>2</sup> Yam tuh' a keutong'nyarok rui' na', tu' ngawl na' a nui ri pucti huk' seun' tu' ngawl dom' keuting neum keutong'nyarok na'. A kang' seunyi na' mae' mao' na' duim'lawng. <sup>3</sup> A'htul cum keuting na' a pucti lih neum tu' ngawl na'. A peul' lih pang bhen' keute' na'. A pun pit seun' pit ka keutam'tim' pang bhen' keute' na'. <sup>4</sup> A pun leukah' un' va ri yeuh rip yuim, kleum' hku' mae' ku' lha' seungal ka pang bhen' keute' na' ce lu. Daecti a pun leukah' yeuh yawo peue un' pun ri tawk' ta'ra' Eun

Peucawo' ri rel' ri na' ce sui'. <sup>5</sup> A un' kue' ti'ca kaw toh ce. A pun yawo ahkvang kaw keunhap' ce hpawn' chi'. Hkam' hk'a' keunhap' awn' a seun' hkam' ku' huic' sui' ka keutam'tim' na'. <sup>6</sup> Hk'a'naee yam awn' na, ce kaw klawng ri sok hk'a' yeum na', daecti ce hkuin' kaw sok ri nyu a. Ce saec' na' sum' yeum, daecti hk'a' yeum na' a kaw hk'uih heul' hk'ai' ce.

<sup>7</sup> A'htul awn' a seun' rawng peueng' suik' rangraen ri kaw heul' peueng' suik' na'. Cing' ce na' a cuip' ku' seun' cui'maw hk'il' ko', buh ce na' a seun' buh peue ko', <sup>8</sup> huik' ce na' a seun' huik' beun' ko', rang' ce na' a seun' rang' ka leuvai sangsi' na' ko', <sup>9</sup> hpa'la kang' nuk' ce na' a seun' hpa'la lhec' ko', seng' raws' ce hk'ec' ri na' a seun' seng' rawng peueng' suik' heun'heun' na' mae' a seun' seng' law ka rawng peueng' suik' na' hk'uih a heul' lec' vang peueng' suik' na' ko'. <sup>10</sup> Ce kue' seuta' kue' peutnuic seun' keutam'tim' na' ko'. Seuta' ce na' a kue' pit kaw keunhap' peue pun hpawn' chi' na'. <sup>11</sup> Hkun'haw'hkam' ce na' a meuh in'hpom ka keutong'nyarok rui' na' eun. Muis eun na' leukah' Hebrae' ka a meuh "Abadon", leukah' Helasa' ka a meuh "Apaw'liyon".\*

<sup>12</sup> Ku' kuit nyhap' keuting nanggal' na' hawc' ka hawc'. Ku' kuit nyhap' lal' ceu na' a kaw' kaw ing' bae.

<sup>13</sup> Yam in'hpom les peue ti peue na' puing' eun pi'tae'rae' ri na', ui' pun ri mhawng' seng' pucti lih neum nang ce' ka vang dum ri tan meuh hk'il' ut' nanggal' Eun Peucawo' na'. <sup>14</sup> Seng' awn' a lah' ri ri in'hpom les peue ti peue kue' pi'tae'rae' na' eun, "Kah' ri plo'e in'hpom pun' peue mawt ri keunam klong' ka Yufetis' na' ce reu'." <sup>15</sup> Kop awn' na, in'hpom pun' peue ku' Peucawo' rangraen Eun ri uin' ce punta nali, seunyi, chi' neum aen' ce na' pun ce ri

---

\* **9:11** 9:11 Vangdoh' ka "Abadon" mae' "Apaw'liyon" na' a lah', "nangyeuh ku' lulaic".

kah' ri ploé' ri heul' toh peue bhen' keuté' na' peue loé' pun ti pun. <sup>16</sup> Uí' pun ri mhawng' peue suik' pawk rawng na' kue' ce la' pak' lan peue.

<sup>17</sup> Rawng na' maeé' peue pawk rawng pun uí' ri nyu ce nang limit na' ruprang ce na' kue' a yeuhki'. Peue pawk rawng na' ce cuip' hpa'la kang' nuk' seurak' seun' ngawl, hpa'la lheun' maeé' hpa'la seun' mat na' ko'. Cing' ka rawng na' a seun' cing' ka leuvai sangsi' na'. A ru' piu' ngawl, tu' ngawl maeé' mat na' lih hk'ai' moeng ri na'. <sup>18</sup> Peue na' peue loé' pun ti pun peue pun ri yeum kopti ku' kuit nyhap' loé' ceu na', a meuh piu' ngawl, tu' ngawl maeé' mat ru' ri lih hk'ai' moeng ka awn' na. <sup>19</sup> Ku' hk'o' lhat' ka rawng na' a ut' ri moeng ka na' maeé' seuta' ka na', kopti seuta' ka na' seun' a seueueng' kue' cing' heun' cing' na' ko'. A cu cing' ri na' a yeuh peue lu ri ka.

<sup>20</sup> Peue un' nang yeum ri ku' keunhap' keuting aen' a na' ce, ce hkuin' nang taws' hpum' fuin map' ri ri kan' ku' yeuh ri na'. Ce hkuin' nang tecla faeé' seuca' na' maeé' faeé' ruphtu ku' ti peue hk'il', leumuil, tong, seumu maeé' hku' peue pleng' a na'. A meuh ruphtu a un' cang nyu, un' cang mhawng', un' cang long hk'a'. <sup>21</sup> Ce ku' hkuin' nang taws' hpum' fuin map' ri tecla toh puri na', yeuh kahta' na', hkuit' nawng' tang' na' maeé' rabawk' peue na', ce kaw' meung yeuh a.

## 10

### *In' hpom maeé' bawl' htawm aet'*

<sup>1</sup> Hawc' awn' na, uí' pun ri nyu in' hpom seubu tí' ca keuting lih eun neum kuing' pang mao' na' ti peue. Putum' na' a ghui' tu' eun na'. Hk'a' pang ka cing' eun na' a kue' peuyongtong. Buh eun na' a seun' seunyi na' ko', cung eun na' a seun' kleum' rawng' buih ha' ri reung ngawl na' ko'.

<sup>2</sup> Nang tí' eun na' a kue' bawl' htawm aet' a glas ri. Cung

## Htawm Tuh' ri tuil' 10:32 Htawm Tuh' ri tuil' 1

a'tawm' eun na' a buin nang mha'seumut' na', cung a've' eun na' a buin pang bhen' keute' na'. <sup>3</sup> Eun klawng seng' laws' seun' seng' klawng ka leuvai sangsi' na' ko'. Yam klawng eun na', seng' neumhk'i a' res seng' na' a ku top' a. <sup>4</sup> Yam neumhk'i a' res seng' na' laws' ka, ui' rangraen ri kaw tem' a na', ui' pun ri mhawng' seng' laws' neum kuing' pang maó' na' a lah', "Ku' lah' ka neumhk'i a' res seng' na' ri' a nang hpum' mi reu', pawlaee tem' a."

<sup>5</sup> Hawc' ko', in'hpom pun ui' ri nyu cawng eun ri bhen' keute' ri mha'seumut' na' yuk eun ti' a'tawm' ri na' huk' pang maó' na'. <sup>6</sup> Eun hkam' sa'hki' hk'a'naee vang cu ri Peucawo' a'yu im' cot'cu ku' hpanpleng' kuing' pang maó' mae' ku' kue' hk'a'naee ka na' gawm'euc', ku' hpanpleng' bhen' keute' mae' ku' kue' hk'a'naee ka na' gawm'euc', ku' hpanpleng' mha'seumut' mae' ku' kue' hk'a'naee ka na' gawm'euc'. Eun hkam' sa'hki' yeuh keutit', "Yam ka na' hpaw a ca' kaw laee ling' bae. <sup>7</sup> Daecti yam in'hpom a' res peue ti peue na' puing' eun pi'tae'rae' ri na', hk'a' kan' rui' Eun Peucawo' na' kaw a htonnuk seun' ku' pao' Eun ri peue suip leukah' ri ku' meuh mhai' Eun na' ce na'."

<sup>8</sup> Hawc' ko', seng' neum kuing' pang maó' na' a tang lah' a ri ui' bae, "Heul' ti bawl' htawm glas ri ri ti' eun in'hpom ku' cawng ri bhen' keute' ri mha'seumut' na' eun reu'."

<sup>9</sup> Kop awn' na, ui' heul' hk'o' bawl' htawm awn' a ri in'hpom na' eun. Eun lah' a ri ui', "Ti mi hk'a a reu'. Kaw a na nang keuteul mi na'. Daecti yam ut' a nang moeng mi na', a kaw teo' seun' leuum' cing' peuyhel' na'." <sup>10</sup> Ui' ti bawl' htawm aet' awn' a hk'ai' ti' eun in'hpom na', ui' hk'a a. Yam' ut' a nang moeng ui' na', a teo' seun' leuum' cing' peuyhel' na'. Daecti yam gleut ui' a lec keuteul ri na', a keut' ri na. <sup>11</sup> Hawc' ko', leukah' ti moeng na' a lah' ri ri ui', "Kaw mi kah ri lah' lawng peue ceu heun' ceu na', lawng

kuing' heun' kuing' na', lawng leukah' heun' ceu na' maeé' lawng hkun'haw'hkam' heun' peue na' baeé."

## 11

### *Nang hkam' sa'hki' lal' peue*

<sup>1</sup> Hawc' awn' na, ui' pun maeéaw' ti lhem', ruprang ka na' a seun' ku' keutec na'. Ui' pun leukah' tawm' yeuh keutit', "Heul' keutec nya hk'o' mun' keuting Eun Peucawo' na' maeé' vang dum ri tan ku' tan na', maeé' peue hk'o' mun' mawn' na' ce ci' kue' a'neng peue na', mhin' ce reu'. <sup>2</sup> Daecti kang' hkung' hk'a'nok ka nya hk'o' mun' keuting na' pawlaee keutec a. Kopti ap a ri ri peue un' meuh peue ceu Yu'da na' ce hawc'. Ce kaw jap' buin veng seunga' chak' awn' a rot pun' kul' leual' chi'. <sup>3</sup> Ui' kaw tuil' ti'ca na' ri nang hkam' sa'hki' ui' lal' peue na' ka. Ka kaw cuip' hk'eung hpen' htong'tai' na', ka na' sangsawn' leukah' mun' ren'kawn na' rot tiheng' lal' pak' leskul' seunyi." <sup>4</sup> Nang hkam' sa'hki' lal' peue aen' ka meuh kleum' sanlon lal' kleum' maeé' bin' ngawl lal' bin' ut' nanggal' Eun Peucawo' bhen' keute' na'. <sup>5</sup> Ngawl na' a kaw ru' ri lih hk'ai' moeng ka na', a na' heul' ha' peue kaw ing' yeuh ka lu na' ce. Peue kaw ing' yeuh ka lu na' ce kaw pun ri yeum yeuh keutit'. <sup>6</sup> Ka kue' ti'ca kaw kang' mao' na' un' va a lhe' yam buih sangsawn' ka leukah' mun' ren'kawn na'. Ka ku' kue' ti'ca yeuh leuum' na' meuh nham'. Ka saec' sum' yeuh ku' kuit nyhap' ku' ceu na' lih ri bhen' keute' na' a'neng pok ka ku' kue' ti'ca cang yeuh a yeut.

<sup>7</sup> Yam hawc' hkam' ka sa'hki' na', sat' rai pucti lih neum keutong' nyarok rui' na' a yeuh ka sui'. A kaw pe ka, toh ka yeum. <sup>8</sup> A uin' tu' yeum ka na' nang ngon' hk'a' ka veng keuting na'. Muis sa'leuhkok' ka veng na' a muis veng So'dom maeé' veng E'ji'tu'. Veng awn' a meuh veng vang Peucawo' e' na' pun Eun ri hkam' tawk' peue

ri pang kleum' rawng'tawp' na'. <sup>9</sup> Hk'a'naee loe' seunyi pai' hk'eung seunyi na' peue ing' neum peue ceu na' ku ceu, neum ceucat na' ku ceucat, neum leukah' na' ku ceu mae' neum kuing' na' ku kuing' peue kaw ing' cu ri nawk tu' yeum ka na'. Ce un' kah peue puing' tu' ka na'. <sup>10</sup> Peue bhen' keute' na' ce kaw nawk tu' yeum ka na' mae' ren'kawn ri. Ce kaw yeuh hk'a' ren'kawn munkvaen tuil' lapsawng' ri puri. Kopti peue suip leukah' Eun Peucawo' awn' keunhap' ka peue ut' pang bhen' keute' na' ce na'.

<sup>11</sup> Daecti yam hawc' ka loe' seunyi pai' hk'eung seunyi na', Peucawo' Eun puing' cit' a'yu im' na' lec hk'a'naee tu' ka na'. Ka tawl' kuh' cawng. Peue pun ri nyu a na' ce lhat' nyawk'. <sup>12</sup> Hawc' ko', ce pun ri mhawng' seng' laws' lih neum kuing' pang ma' na' a lah' a ri ka, "Huk' maen' reu'." Hawc' ko', ka ku huk' nang putum' na' ka huk' nang kuing' pang ma' yam ransu ka na' buih nawk ce ka na'.

<sup>13</sup> Yam nali awn' na, a in'san' reng nyawk'. Veng awn' na kul' pun ti pun na' a lhu'jah. Peue yeum ri in'san' awn' na a' res heng' peue. Peue lawt yeum ri na' ce lhat' nyawk'. Ce suk' seun' munhpung' Eun Peucawo' kuing' pang ma' na'.

<sup>14</sup> Ku' kuit nyhap' keuting lal' ceu ti ceu na' hawc' ka hawc'. Ku' kuit nyhap' keuting loe' ceu ti ceu na', un' ling', kaw a ing' rot.

*Pi'tae'rae' a' res deul ti deul*

<sup>15</sup> Yam in'hpom a' res peue ti peue na' puing' eun pi'tae'rae' ri na', a kue' seng' laws' nyawk' heun' seng' a laws' lih neum kuing' pang ma' na'. A lah',  
"Kuing' ka bhen' keute' na' keut' a ri meuh kuing' Eun Peucawo' e' na' mae' kuing' Eun Hkrit na' hawc'. Eun kaw u'peung a cot'cu ri."

<sup>16</sup> Hawc' ko', nang kawt lal'kul' pun' peue sawng' mok' pang ten ri nanggal' Eun Peucawo' na' ce nghup' ri faee' Peucawo' Eun. <sup>17</sup> Ce lah',

“Kopti yeuh Mi ti'ca keuting Mi na' pucti lih na' mae' u'peung Mi kuing' na' hawc' na',  
ye mun' keuting ri Mi Cawo' Peucawo' ti'ca keuting,  
Cawo' a'yu im' maet'maen' mae' yam pon heul' hawc' na'.

<sup>18</sup> Peue bhen' keute' na' seungeueng' ce,  
daecti hk'a' seungeueng' Mi na' mae' yam awn' a ing' rot hawc'.

A meuh yam kaw Mi taws' a'mu ri peue yeum na' ce,  
yam kaw Mi tuil' lapsawng' ri peue suip leukah' mun' ren'kawn meuh mhai' Mi na' ce,  
ri peue Mi na' ce mae' ri peue aet' peue keuting ku' hkopyawm' ri muis Mi na' ce.

A meuh yam kaw Mi yeuh ku' lulaic ri peue yeuh bhen' keute' a lu na' ce.”

<sup>19</sup> Hawc' ko', nya hk'o' mun' keuting Eun Peucawo' nang kuing' pang ma' na' a tah' ri. Ui' pun ri nyu teuk kati sat'ca' hk'a'naee nya hk'o' mun' keuting na'. Hawc' ko', a cak'cal' ceng' yhapyhap, seng' ruingruing, seng' neumhk'i reng, in'san' mae' a'hk'el' reng nyawk'.

## 12

### *Beun' mae' peuyong*

<sup>1</sup> Hawc' awn' na, a kue' het' keuting hk'o'am' pucti lih nang kuing' pang ma' na'. A meuh beun' eun cuip' seunyi na' meuh hk'eung ri, a'chi' na' a ut' hk'a'ruim cung eun, eun cuip' seumeueng' kul'leual' meul' na' meuh cui'maw hk'il' ri cing' ri na'. <sup>2</sup> Beun' awn' eun nyhel', eun aec'rak ri sui'awng' ri kopti kaw eun kue' kon' hawc' na'. <sup>3</sup> Hawc' ko', a kue' het' keuting pucti lih nang kuing' pang ma' na'

bae ti ceu. A meuh peuyong seurak' keuting ti tu'. A kue' cing' a' res cing' maeé' reung' kul' reung'. Cing' ka na' a cuip' cui'maw hk'il'. <sup>4</sup> Seuta' ka na' a ta'faet' seumeueng' kue' pang maó' na' hk'uic' pang bhen' keute' na' loe' pun ti pun. Punta peuyong na' kaw a ko' ri hk'a kon' nyom na' eun maeé' keut' eun na', a cawng nanggal' ka beun' kaw keut' kon' na' eun. <sup>5</sup> Beun' awn' ka keut' kon' me. Eun kaw u'peung kuing' na' gawm'euc' ri hku'ji lhec' ri na'. Eun pucti lih yuk ri huk' ri Peucawó' Eun nang tenceo' Eun Peucawó' na'. <sup>6</sup> Beun' awn' ka hk'uih heul' nang vang hk'oh'hk'oeng' vang Peucawó' mhe' Eun ri uin' pun ka na'. Teh' na', ka kaw pun ri rok'sa' uii' ri tiheng' lal'pak' leskul' seunyi ri ka.

<sup>7</sup> Yam awn' na, a kue' suik' nang kuing' pang maó' na'. Mi'hkelá' maeé' in'hpom eun na' ce peueng' suik' ri peuyong na' maeé' in'hpom ka na' ce. <sup>8</sup> Muk ka hk'a' peuyong na' a sum, a pun ri ra ri hk'uih hk'ai' kuing' pang maó' na'. <sup>9</sup> Peuyong keuting na' a pun ri fat' ri tec ri lih. Peuyong awn' a meuh seueueng' leumah' na', peue klawng a meuh seuca' rai, a'ko' meuh Satan. A cop'long peue bhen' keute' na' peue kleuc' hk'a' ri gawm'euc'. A pun ri fat' ri tec ri lih pang bhen' keute' na' maeé' in'hpom ri na' ce tiduih'.

<sup>10</sup> Hawc' ko', ui' pun ri mhawng' seng' laws' nang kuing' pang maó' na'. A lah',

“Maet'maen', hk'a' htut lawtpon na', ti'ca na' maeé' kuing'  
 Eun Peucawó' e' na'  
 maeé' an'nya ti'ca Eun Hkrit na' rot ka hawc'.

Kopti ku' tang' map' hk'a' pang ec'awng' e'  
 nanggal' Eun Peucawó' gawm' sum' gawm' seunyi na'  
 pun a ri kue ri tec ri lih hawc'.

<sup>11</sup> Ce pe ro' ka seuca' rai na' eun  
 ri nham' Eun Kon'yung' na'

maee' ri leukah' hkam' ce sa'hki' ri na' hawc'.  
Ce un' lhat' ri yeum,  
un' se'dai' a'yu ri.

<sup>12</sup> Kop awn' na, kuing' pang maon' na'  
maee' peue kuing' pang maon' na' ren'kawn reu'.  
Daecti bhen' keute' na' maee' mha'seumut' na'  
kaw a pun ri kuit nyhap' nyawk',  
kopti seuca' rai na' lih a ri pe' hawc'.  
Kopti yawng a yam ri na' un' laee kue' a ling' na',  
a seungeueng' nyawk'."

<sup>13</sup> Yam peuyong na' pun a ri nyu tu' ri na' pun a ri tec  
ri lih pang bhen' keute' na', a ruip beun' keut' kon' me  
na' ka. <sup>14</sup> Punta beun' awn' kaw ka peul' heul' ri vang  
hk'oh'hk'oeng' vang rangraen ri pun ka na', ka pun hk'ec'  
ka klang' keuting na' lal' hk'ec'. Punta peuyong na' kaw  
a un' rot ri ka na', ka kaw pun ri rokso' uii' ri teh' loe'  
neum huh'. <sup>15</sup> Punta leuum' na' kaw a ngam' beun' na'  
ka hot' ri heul' na', peuyong na' a ru' leuum' na' lih hk'ai'  
moeng ri na' heun'heun' seun' klong' na'. <sup>16</sup> Daecti bhen'  
keute' na' a teum'kawm beun' na' ka. A gvas ang' ri, a  
bip leuum' peuyong na' ru' ka na' hit'. <sup>17</sup> Peuyong na' a  
seungeueng' nyawk' ri beun' na' ka. A heul' peueng' suik' ri  
kon' kawn' vang ka na' ce. Kon' awn' ce ko', ce meuh peue  
leuceng leukah' tuil' Eun Peucawo' na' maee' kati keutawn'  
ri sa'hki' lawng Eun Yesu' na'. Peuyong na' a cawng pang  
kaw' sai keunam mha'seumut' na'.\*

## 13

### *Sat' rai pucti huk' neum mha'seumut'*

<sup>1</sup> Hawc' ko', ui' pun ri nyu sat' rai ti tu' puc a ri huk' neum  
mha'seumut' na'. A kue' cing' a' res cing' maee' reung' kul'

\* **12:17** 12:17 Nang htawm Seunga' na' ngon', ton aen' ut' a ri nambat  
keuting 13 na'.

reung'. Reung' ka na' a chuip' cui'maw hk'il' kul' meul'. Cing' ka na' a tem' tu' muis leukah' un' nawpsang Peucawo' Eun na'. <sup>2</sup> Tu' ka sat' rai pun uí' ri nyu awn' a seun' leuvai awk' na', daecti cung ka na' a seun' cung hk'is' na', moeng ka na' a seun' moeng ka leuvai sangsi' na'. Peuyong na' a tuil' ten maeé' tí'ca keuting ri na' ri sat' rai awn' na. <sup>3</sup> Cing' ka sat' rai na' ti cing' a kue' roe vang sui' hk'o' a kaw yeum, daecti a cuin hawc'. Peue bhen' keute' na' ce gawm'euc' ce hot' sat' rai na' maeé' am' ri. <sup>4</sup> Ce nghup' ri faeé' peuyong na' kopti tuil' a tí'ca ri na' ri sat' rai na'. Saec' meuh sat' rai na', ce ku nghup' ri faeé' a yeut. Ce mhaing' puri lah', "A'nhaw' cí' seun' sat' aen' na? A'nhaw' cí' kaw cang peueng' suik' ri ka?"

<sup>5</sup> Sat' rai na' a pun ahkvang kaw lah' leukah' mhawng' ri hk'o'cuin na' maeé' leukah' un' nawpsang Peucawo' Eun na'. A pun ahkvang kaw a lo' tí'ca ri na' pun'kul' leual' chi'. <sup>6</sup> A lah' leukah' un' hkopyawm' ri Peucawo' Eun na'. A saesawm' muis Eun na', gawm' vang ut' Eun na', gawm' peue kuing' pang mao' na' ce. <sup>7</sup> A pun ahkvang kaw peueng' suik' ri peue Eun Peucawo' na' ce maeé' ahkvang meuh cawo' pe na'. A pun an'nya tí'ca hk'a' pang peue ceu na' peue ku ceu, ceucat na' ku ceucat, leukah' na' ku ceu maeé' kuing' na' ku kuing'. <sup>8</sup> Peue bhen' keute' gawm'euc' na' ce kaw faeé' sat' rai awn' na. Peue awn' meuh ce peue un' kue' muis hk'a'naee htawm civit im' Eun Kon'yung' ku' pun ri hkam' toh peue ri tang' neum yam hpanpleng' bhen' keute' na' Eun.

<sup>9</sup> Peue kue' yhuk' na', leuceng a reu'.

<sup>10</sup> A'nhaw' lawn hteuk ri kaw pun ri hk'awng' ri ko',  
eun kaw pun ri hkam' a.

A'nhaw' lawn hteuk ri kaw yeum ri leungawng ko',  
eun kaw pun ri yeum ri leungawng.

Lawng aen' na, peue Eun Peucawo' na' ce kaw kah ri kue' hk'a' yeun' hkam na' mae' hk'a' kati keutawn' na'.

*Sat' rai puc ri huk' neum bhen' keute'*

<sup>11</sup> Hawc' ko', ui' nyu sat' rai seubu na' puc a ri huk' neum bhen' keute' na' ti tu'. A kue' reung' lal' reung' seun' reung' ka kon'yung' na' ko', daecti a leukah' seun' peuyong na'. <sup>12</sup> A tang' tu' ka sat' rai nanggal' na', a lo' ti'ca ka na' gawm'euc'. A yeuh bhen' keute' na' mae' peue bhen' keute' na' ce fae' sat' rai nanggal' ku' kue' roe vang sui' keuting cuin hawc' na'. <sup>13</sup> A yeuh het' keuting hk'o'am na' rot ti yeuh a ngawl neum kuing' pang mao' na' hk'ui'c' lih pang bhen' keute' na' nanggal' to' nha' peue peue na'. <sup>14</sup> Kopti meuh a het' keuting pun a ri rap ri ti ti'ca kaw yeuh a tang' tu' ka sat' rai nanggal' na', a cop' peue bhen' keute' na' peue. Punta kaw a meuh munhpung' pun sat' rai ku' a saec' pun ri mawk ri ri leungawng daecti a hkuin' nang yeum na', sat' rai lal' tu' ti tu' na' a kah peue na' peue pleng' ruphtu rup ka sat' rai nanggal' na'. <sup>15</sup> Punta ruphtu na' kaw a cang leukah' mae' kaw a cang yeuh peue un' yawm' ri fae' a na' ce yeum, a pun ti'ca kaw tuil' hk'a' ghuih' bhum' na' ri ruphtu na'. <sup>16</sup> Saec' meuh peue aet' peue keuting, peue meuneum peue hk'o'tukyak mae' peue un' meuh mhai' peue meuh mhai' na' peue, a tec'teng kah peue rap ri ti vang mhai' ri hk'a' ti' a'tawm' ri na', a'ko' ri rel' ri na' ku peue ri. <sup>17</sup> A'nhaw' lawn un' kue' vang mhai' ku' meuh muis ka sat' rai na', a'ko' nambat ka muis ka na' ko', ce hkuin' kaw cang leuvaee cang paing' hk'eung ri puri.

<sup>18</sup> Lawng aen' na, kah ri lo' cu'yi. A'nhaw' lawn leuceng pun a ko', kah eun kuit ri nawk nambat ka sat' rai na' reu'. Kopti meuh a nambat eun peue ti peue na'. Nambat eun na' a meuh 666.

## 14

### *Kon'yung' mae' peue 144,000 peue*

<sup>1</sup> Hawc' awn' na, ui' keue'. Ui' pun ri nyu Kon'yung' na' cawng Eun mae' peue tisaen' pun'mhuin' pun'heng' peue na' ce pang gong Yi'on na'. Peue awn' ce tem' muis Eun Kon'yung' na' mae' muis Eun A'kuiing' na' ri rel' ri na'. <sup>2</sup> Hawc' ko', ui' pun ri mhawng' seng' laws' neum kuing' pang mao' na' a seun' seng' leuum' dhim' ri hot' klong' na' mae' seng' neumhk'i reng na'. Seng' pun ui' ri mhawng' na' a seun' seng' tet' ting' ce muk peue tet' ting' ri na'. <sup>3</sup> Ce lah' seng' htawm hk'u' na' nanggal' ka tenceo' na', nanggal' ka ku' a'yu im' pun' tu' na' mae' nanggal' ce nang kawt na'. A lawn un' meuh peue tisaen' pun'mhuin' pun'heng' peue ku' htut ri neum bhen' keute' na' ce ko', a'nhaw' hkuin' cang lah' seng' htawm hk'u' awn' na saec' ti peue. <sup>4</sup> Peue awn' ce meuh peue un' yeuh ku' hk'aw'jeuk ri beun', kopti roksa' ce tu' ri seunga' chak' meun na'. Ce hot' Kon'yung' na' Eun ku duih'. Ce meuh peue Peucawo' htut Eun ce neum peue punta kaw ce meuh pli' nanggal' tan ri ri Peucawo' Eun na' mae' ri Kon'yung' na' Eun. <sup>5</sup> Leukah' chi'lai na' a hkuin' lih hk'ai' moeng ce na'. Ce hkuin' kue' vang ri saec' ti ceu.

### *In'hpom loe' peue*

<sup>6</sup> Hawc' awn' na, ui' pun ri nyu in'hpom seubu na' peul' eun huk' nang vawo na' ti peue. Eun pa'o' leukah' mun' ren'kawn cot'cu na' ri peue kuing' na' ku kuing', peue ceu na' peue ku ceu, leukah' na' ku ceu mae' ceucat na' ku ceucat. <sup>7</sup> Eun klawng ri lah' laws', "Lhat'til ri Peucawo' Eun, tuil' munhpung' Eun reu'. Kopti rot a yam taws' Eun a'mu hawc'. Fae' Peucawo' Cawo' hpanpleng' kuing' pang mao', bhen' keute', mha'seumut' na' mae' keutui' leuum' na' Eun reu'."

<sup>8</sup> In'hpom la' peue ti peue na' eun ing' hot'. Eun lah', "Lhu'jah ka hawc', veng keuting Babu'lon ku' yeuh peue yuic' ri leuum' pli' bui mae' len'cu na' pun a ri lhu'jah hawc'."

<sup>9</sup> In'hpom loe' peue ti peue na' eun tang ing' hot'. Eun klawng ri lah' laws' a, "A'nhaw' lawn faee' sat' rai na' mae' ruphtu rup ka na', mae' rap ri ti vang mhai' ka na' ri rel' ri, a'ko' ri ti' ri na' ko', <sup>10</sup> eun kaw kah ri nyui leuum' pli' bui seungeueng' Eun Peucawo' ku' raeh ri lih nang kaw' seungeueng' Eun a un' laee hkawo' keunhaw' na'. Eun kaw pun ri hkam' hk'a' ciyang ri ngawl mat na' nanggal' ce in'hpom seunga' na' mae' nanggal' Eun Kon'yung' na'.

<sup>11</sup> Tu' ngawl ka hk'a' ciyang hkam' eun na' a kaw nui ri huk' cot'cu. Peue faee' sat' rai na' mae' ruphtu rup ka na', a'ko' peue rap ri ti vang mhai' ka muis ka na', ce hkuin' kaw laee pun ri keului' ri gawm' sum' gawm' seunyi." <sup>12</sup> Lawng aen' na, peue Eun Peucawo' ku' leuceng ri ti leukah' ritroe Eun na' mae' ku' kati keutawn' ri Yesu' Eun na' ce kaw kah ri kue' hk'a' yeun' hkam' na'.

<sup>13</sup> Hawc' ko', ui' pun ri mhawng' seng' lih neum kuing' pang ma' na' a lah', "Tem' a yeuhki', 'Tang' neum maet'-maen' na' hk'a' ren'kawn na' kaw a kue' ri peue sum' a'yu ri pun Peucawo' Eun na' ce.' " Cit' seunga' na' a lah', "Cawp' ka hawc', ce kaw keului' yeuh kan' reng ri na' kopti kan' ku' yeuh ce na' kaw a hot' ce heul' na'."

*Vuic bhen' keute' na'*

<sup>14</sup> Ui' keue', ui' pun ri nyu putum' paing na' mae' peue ti peue "Eun seun' Kon' ai' peue na' Eun"\* Eun mok' hk'a' pang ka putum' na'. Eun cuip' cui'maw hk'il' na' ri cing' ri na'. Nang ti' Eun na' a kue' guc' lawm nyawk' na'.

<sup>15</sup> Hawc' ko', in'hpom seubu na' eun pucti lih neum nya

---

\* 14:14 14:14 Dayela' 7:13

hk'o' mun' keuting na'. Eun klawng ri lah' laws' a ri ku' mok' pang putum' na' Eun, "Lo' guc' Mi na' vuic a reu', rot a yam vuic ka hawc', kopti pli' seukuk kaw vuic ka bhen' keute' na' keutuim ka hawc'." <sup>16</sup> Kop awn' na, ku' mok' pang putum' na' Eun vuic guc' ri na' hk'a' pang bhen' keute' na', bhen' keute' na' a pun ri vuic ri. <sup>17</sup> In'hpom seubu na' eun pucti neum nya hk'o' mun' keuting ka kuing' pang maó' na'. Eun ku' jhawp' guc' lawm nyawk' na' yeut. <sup>18</sup> Hawc' ko', in'hpom seubu ku' meuh nang roksa' ngawl na' eun pucti lih neum vang dum ri tan ku' tan na'. Eun klawng ri lah' laws' a ri ku' jhawp' guc' lawm nyawk' na' eun, "Ti guc' lawm nyawk' mi na' vuic ri ti seukuk ka pli' bui bhen' keute' na' reu', kopti pli' bui na' keutuim ka hawc'." <sup>19</sup> In'hpom ku' jhawp' guc' na' eun ku' hko' guc' ri na' hk'a' pang bhen' keute' na', eun vuic ri ti pli' bui na'. Hawc' ko', eun nyon pli' bui na' hk'a'nae keutui' keuting a meuh vang bet' leuum' pli' bui seungeueng' Eun Peucawo' na'. <sup>20</sup> Ce kaw pun ri hkam' chok' chec' ri nang keutui' vang bet' leuum' pli' bui hk'a' nok ka veng na'. Nham' ce na' a nuk keutui' na' a bah pucti lih lhung' keuteul mu' lhec' klong moeng ka rawng na'. A nyhae' lhae' heul' tiheng' lespak' satadi†.

## 15

### *In'hpom a' res peue mae' ku' keunhap' keuting a' res ceu*

<sup>1</sup> Ui' pun ri nyu het' keuting ku' hk'o'am' nyawk' seubu nang kuing' pang maó' na'. A meuh in'hpom a' res peue na' ce mae' ku' keunhap' keuting a' res ceu na'. Ku' keunhap' keuting awn' a meuh ku' keunhap' vang tisut' ka na', kopti hk'a' seungeueng' Eun Peucawo' na' kaw a euc' ri ku' keunhap' keuting awn' na. <sup>2</sup> Ui' pun ri nyu ku' ti ceu a

† 14:20 14:20 1,600 satadi na' a meuh hk'ao tipak' seudi' kul' lak', a' ko' hk'ao loe' pak' ki' lo'.

seun' mha'seumut' glawk' ceo' hkawo' ngawl na'. Peue pe sat' rai na', ruphtu rup ka na' mae' vang mhai' ka muis ka na' ce cawng keunam ka mha'seumut' na'. Ce jhawp' ting' ku' Peucawo' tuil' Eun ri ce na'. <sup>3</sup> Ce lah' seng' htawm eun Mo'se ku' meuh mhai' Eun Peucawo' na' mae' seng' htawm Eun Kon'yung' na'. Ce lah',

“Cawo' Peucawo', Peucawo' ti'ca keuting,  
kan' Mi na' keuting ka, a hk'o'am' nyawk'.

Cawo' Hkun'haw'hkam' ku cu,  
hk'a' Mi na' leupaws seumeu' ka, a meuh ku' neum.

<sup>4</sup> Cawo' Peucawo', a'nhaw' ci' kaw un' lhat'til ri Mi?  
A'nhaw' ci' kaw un' tuil' munhpung' ri muis Mi na'?

Kopti Mi ri palkoe seunga' chak' Mi.

Peue ceu gawm'euc' kaw peue ing' ri Mi,  
peue kaw faee' Mi nanggal' Mi na',

kopti kan' leupaws seumeu' yeuh Mi na', puc a ri glih'-  
gleueng' hawc'.”

<sup>5</sup> Hawc' awn' na, ui' pun ri nyu nya hk'o' mun' keuting ka kuing' pang ma' na' tah' a ri. Nya hk'o' mun' keuting awn' a meuh tup' kati sat'ca' na'. <sup>6</sup> In'hpom a'res peue ku' jhawp' ku' keunhap' keuting a'res ceu na' ce pucti lih neum nya hk'o' mun' keuting na'. Ce cuip' hk'o' hpen' linin seunga' seungung na'. Ce mawt saee'hang hk'il' ri nuk' ri na'. <sup>7</sup> Hawc' ko', ku' a'yu im' pun' tu' na' ku' ti tu' ka na' a ti ri tuil' paen' hk'il' seuglong' a'res meul' ku' seungeueng' Eun Peucawo' a'yu im' cot'cu na' nuk ka a na' ri in'hpom a'res peue na' ce. <sup>8</sup> Hawc' ko', tu' ngawl lih neum munhpung' Eun Peucawo' na' mae' lih neum ti'ca Eun na' a nuk hk'a'naee ka nya hk'o' mun' keuting na'. Ku' keunhap' keuting a'res ceu ce in'hpom a'res peue na' a lawn un' nang hawc' ko', a'nhaw' hkuin' kaw cang ing' lec nang nya hk'o' mun' keuting na' saec' ti peue.

## 16

### *Paen' seuglong' ka seungeueng' Eun Peucawo' a' res meul'*

<sup>1</sup> Hawc' awn' na, uí pun ri mhawng' seng' laws' na' puc a ri lih neum nya hk'o' mun' keuting na'. A lah' a ri in'hpom a' res peue na' ce, "Heul' bah ku' seungeueng' Eun Peucawo' ku' ut' hk'a' naee paen' seuglong' a' res meul' na' lih pang bhen' keute' na' reu'."

<sup>2</sup> In'hpom nanggal' ti peue na' eun heul' bah paen' seuglong' ri na' pang bhen' keute' na'. Vang sui' seueum' gvas hk'aw' jeuk ku' sui' nyawk' na' a keut' ri tu' ce peue kue' vang mhai' ka sat' rai na' maeé' peue faee' ruphtu rup ka na' ce.

<sup>3</sup> In'hpom lal' peue ti peue na' eun bah paen' seuglong' ri na' nang mha' seumut' na'. Mha' seumut' na' a keut' ri meuh nham' seun' nham' ce peue yeum na' ko'. Ku' a'yu im' ut' hk'a' naee ka na' a ku yeum gawm' euc' ri.

<sup>4</sup> In'hpom loe' peue ti peue na' eun bah paen' seuglong' ri na' nang klong' na' maeé' keutui' leuum' na' ce. Leuum' na' a keut' ri meuh nham'. <sup>5</sup> Hawc' awn' na, uí pun ri mhawng' in'hpom cawo' roksa' leuum' na' lah' eun,

"Cawo' seunga' chak', Cawo' a'yu im' yam pon hawc' na' maeé' yam maet' maen' na' Mi,  
taws' Mi a' mu hot' hk'a' leupaws seumeu' na' hawc'.

<sup>6</sup> Kopti yeuh ce nham' ce peue Mi na' maeé' nham' ce peue suip leukah' Mi na' peuc' na',  
Mi yeuh ce nyui nham' na', kuing' ce ri hkam' a yeuhki' hawc'."

<sup>7</sup> Hawc' ko', uí pun ri mhawng' seng' htawhkam ka vang dum ri tan ku' tan na', a lah',

"Meuh, Cawo' Peucawo' ti' ca keuting,  
a' mu taws' Mi na' meuh ka neum, a leupaws seumeu'."

<sup>8</sup> In'hpom pun' peue ti peue na' eun bah paen' seuglong' ri na' hk'a'pang seunyi na'. Seunyi na' a pun ti'ca kaw ha' peue. <sup>9</sup> Kuc' ha' lok nyawk' na' a ha' ce. Ce is' jha' muis Eun Peucawo' Cawo' u'peung ku' keunhap' keuting aen' a na' Eun. Daecti ce un' yawm' ri taws' hpum' fuin map' ri map' ri na' mae' tuil' munhpung' Eun Peucawo' na'.

<sup>10</sup> In'hpom hpawn' peue ti peue na' eun bah paen' seuglong' ri na' hk'a'pang ten ka sat' rai na'. Kuing' ka sat' rai na' a lhawc' lec vang duim'lawng na'. Peue na' ce cet dak' ri na' ri tukhka nyawk' ka. <sup>11</sup> Kopti meuh a hk'a' sui' ce na' mae' vang sui' seueum' gvas ce na', ce is' jha' Peucawo' kuing' pang ma' na' Eun. Daecti ce un' yawm' ri taws' hpum' fuin map' ri map' yeuh ce hawc' na'.

<sup>12</sup> In'hpom les peue ti peue na' eun bah paen' seuglong' ri na' nang klong' keuting muis Yufetis' na'. Leuum' ka klong' na' a hit' punta kaw rangraen mhe' hk'a' pun hkun'haw'hkam' ut' hk'a'lih seunyi na' ce. <sup>13</sup> Hawc' ko', ui' pun ri nyu seuca' rai ruprang seun' a'ruk na' loe' tu' a pucti lih neum moeng ka peuyong na', moeng ka sat' rai na' mae' moeng eun peue guil ri meuh peue suip leukah' Eun Peucawo' na'. <sup>14</sup> Ce meuh cit' ka seuca' rai ku' yeuh het' keuting heun' ceu na'. Ce pucti heul' hk'on'ro hkun'haw'hkam' pang bhen' keute' na' ce gawm'euc' punta kaw ce ing' peueng' suik' hk'a'nae seunyi keuting Eun Peucawo' ti'ca keuting na'.

<sup>15</sup> "Keue' reu', kaw Ui' lih seun' peue con' ku' ing' yam a'nhaw' un' pawn peue kui' ri na'. Peue un' it' eun cuip' hk'eung ri rangraen ri na', eun kaw pun ri ren'kawn, kopti kaw eun un' pun ri long hk'a' ut' gung'gang' kaic ri peue."

<sup>16</sup> Hawc' ko', seuca' rai loe' tu' na' ce hk'on'ro hkun'haw'hkam' na' ce ing' hk'om puri vang leukah' Hebrae' lah' ka muis Amage'don na'.

<sup>17</sup> In'hpom a' res peue ti peue na' eun bah paen' seuglong' ri na' nang vawo na'. Seng' laws' nyawk' na' a laws' lih neum tenceo' Eun Peucawo' hk'a'naee nya hk'o' mun' keuting na', a lah', "Hawc' ka hawc'." <sup>18</sup> Hawc' ko', a cak'cal' ceng' yhapyhap, seng' ruingruing, seng' neumhk'i reng maeé' in'san' reng nyawk'. Tang' neum peue na' la peue ri kue' pang bhen' keute' na', a hkuin' nang duing kue' in'san' reng seun' awn' na saec' ti pok. <sup>19</sup> Veng keuting na' a peutih meuh loe' glawk'. Veng keuting ka kuing' na' ce a lhu'jah heul'. Peucawo' Eun un' pil map' ka veng keuting Babu'lon na'. Eun tuil' a nyui kaw' ku' leuum' pli' bui seungeueng' nyawk' Eun na' nuknhen' ka na'. <sup>20</sup> Kaw' na' ku kaw' maeé' gong na' ku meul' a cum' rai' heul' euc'. <sup>21</sup> A' hk'el' keuting nyawk' na' a hk'ui'c' lih neum pang mao', a hk'ui'c' teng' peue. A' hk'el' ti meul' na' a kue' hk'ao ri hpawn'kul' ki'lo'. Kopti ku' keunhap' keuting ka a' hk'el' aen' reng nyawk' ka na', peue na' peue is' jha' Peucawo' Eun.

## 17

### *Beun' paing' tu' ri maeé' sat' rai*

<sup>1</sup> In'hpom a' res peue kue' paen' seuglong' a' res meul' na' ce, ku' ti peue na' eun ing' lah' a ri ui', "Ing' maen', kaw' ui' tuil' mi nawk' hk'a' taws' a' mu ri beun' rai ri paing' tu' ri ku' mok' pang vang leuum' heun' duih' na' eun. <sup>2</sup> Hkun'haw' hkam' pang bhen' keute' na' ce len'cu ri heun' gawm' euc' ri. Peue bhen' keute' na' ce ku nyui ri yui'c' ri leuum' pli' bui len'cu eun beun' awn' na'."

<sup>3</sup> Hawc' ko', in'hpom awn' eun tuil' ui' nyu limit. Eun cu Cit' seunga' na' eun va ui' heul' nang vang hk'oh' hk'oeng' na'. Teh' na', ui' pun ri nyu beun' ti peue eun mok' hk'a' pang ka sat' rai seurak' nyawk' na'. Sat' rai awn' a kue' muis lah' leukah' un' nawpsang Peucawo' Eun na'

hk'awp' tu' ri na'. A kue' cing' a' res cing' mae' reung' kul' reung'. <sup>4</sup> Beun' awn' eun cuip' hk'eung hpen' yawtmong na' mae' hpen' seurak' nyawk' na'. Tu' eun na' a ceng' yhapyhap ri hk'il', seumu seng' mae' seng' seukleu\* na'. Eun jhawp' kaw' hk'il' ku' hk'o'kleh' hk'o'keunah na' mae' ku' hk'aw'jeuk ka len'cu eun nuknhen' ka na'. <sup>5</sup> Ri rel' eun na' a tem' ri yeuh keutit', "Vangdoh' rui' ka veng keuting Babu'lon na', ma ce beun' paing' tu' ri na' ce mae' ma ka ku' hk'o'kleh' hk'o'keunah ka bhen' keute' na' ce gawm'euc' na'."

<sup>6</sup> Uí pun ri nyu beun' awn' yuic' eun ri nham' ce peue Eun Peucawo' na' mae' nham' ce peue hkam' sa' hki' pun Yesu' Eun na'.

Yam nyu uí eun na', uí am' nyawk'. <sup>7</sup> Hawc' ko', in' hpom awn' eun lah' a ri uí, "A cí yeuh keunhaw' mi vae' am'? Kaw uí ris mi mhawng' vangdoh' rui' eun beun' awn' na mae' sat' rai pawk eun ku' kue' cing' a' res cing', kue' reung' kul' reung' na'. <sup>8</sup> Sat' rai pun mi ri nyu na', leumah' tawn kue' a' a'yu yeut, daecti maet' maen' a un' laee kue'. A kaw pucti huk' neum keutong' nyarok rui' na', hawc' ko' a kaw tang lec nang vang lulaic ri na'. Peue bhen' keute' ku' muis ce un' kue' a nang htawm a'yu im' tang' neum yam hpanpleng' bhen' keute' na', yam nyu ce sat' rai awn' na ce kaw am' ri ka. Kopti leumah' a tawn kue' a'yu, maet' maen' a un' laee kue', daecti hk'a' nanggal' ka na' a kaw tang kue' a'yu bae.

<sup>9</sup> Lawng aen' na, a kaw lo' cu'yi kuit ri nawk a. Cing' a' res cing' na' a meuh gong a' res meul' vang beun' awn' mok' eun na'. <sup>10</sup> A ku meuh hkun' haw' hkam' a' res peue na' ce yeut. Ku' hpawn' peue na' yeum ce hawc'. Ku' ti peue na' eun kawn' a'yu im'. Ku' seubu ti peue na' eun un' nang

\* **17:4** 17:4 Seng' seukleu' na' ti peue a ri neum seukleu' ut' nang mha'seumut' na'. A ngos nyawk'.

ing' rot. Daecti yam na' eun ing' rot na', eun kaw ut' yawo ti cu hkaou'. <sup>11</sup> Sat' rai ku' tawn kue' a'yu leumah' na' daecti maet' maen' a un' laee kue' na', a meuh hkun'haw'hkam' seudi' peue ti peue na' eun. Eun ku pawng' hk'a'naee muk ce hkun'haw'hkam' a' res peue na' yeut. Eun buih heul' lec nang vang lulaic ri na'.

<sup>12</sup> Reung' kul' reung' pun mi ri nyu na' a meuh hkun'haw'hkam' ku' un' nang u'peung kuing' ri na' kul' peue na' ce. Daecti ce kaw pun an' nya meuh hkun'haw'hkam' na' mae' sat' rai na' tiduih' ti nali. <sup>13</sup> Ce kaw sahpaw' ri ap an' nya mae' ti'ca ri na' ri sat' rai na'. <sup>14</sup> Ce kaw peung' suik' ri Kon'yung' na' Eun. Daecti Kon'yung' na' Eun kaw peung' pe ce, kopti meuh Eun Cawo' hk'a' pang cawo', Hkun'haw'hkam' hk'a' pang hkun'haw'hkam' gawm'euc' na'. Tapae' kati keutawn' ku' Peucawo' klawng Eun ri leuk ri uin' ce na' ce kaw ut' mae' Heun."

<sup>15</sup> In'hpom na' eun tang lah' a ri ui', "Leuum' nyu mi beun' paing' tu' ri mok' eun hk'a' pang ka na', a meuh peue ceu, muk peue, kuing', mae' leukah' na' ce. <sup>16</sup> Sat' rai na' mae' reung' kul' reung' pun mi ri nyu na' a kaw ces ri beun' paing' tu' ri awn' eun. A kaw yeuh eun lu, uin' eun ut' tu' seurak' ri. A kaw hk'a' keune eun na', hawc' ko' a kaw dum eun ri ngawl na'. <sup>17</sup> Kopti Peucawo' yeuh Eun ce kuit doh' kaw ce hot' ri yeuh alo Eun Peucawo' na', yeuh ce sahpaw' ri ap ti'ca u'peung kuing' ce na' ri sat' rai na', rot ti kaw a htonnuk leukah' Eun Peucawo' na'. <sup>18</sup> Beun' pun mi ri nyu na' eun meuh veng keuting ku' u'peung hkun'haw'hkam' ka bhen' keute' na' ce."

## 18

### *Veng Babu'lon lhu'jah ka*

<sup>1</sup> Hawc' awn' na, ui' pun ri nyu in'hpom seubu na' lih eun neum kuing' pang maou' na' ti peue. Eun kue' ti'ca keuting.

Munhpung' ku' ceng' eun na' a ceng' bhen' keute' na'. <sup>2</sup>Eun ta'ul' ri lah' laws',

“Lhu'jah ka, veng keuting Babu'lon na' lhu'jah ka hawc'.

Veng keuting aen' a keut' ri meuh vang ut' seuca' hawc'.

A meuh vang ut' ka seuca' rai na'.

A meuh vang ut' ka sim' hk'aw'jeuk na' mae' sim' hk'o'kleh' hk'o'keunah na' ku ceu.

<sup>3</sup> Kopti peue ceu gawm'euc' na' nyui ce ri yuic' ri leuum' pli' bui

len'cu ka veng na'.

Hkun'haw'hkam' ka bhen' keute' na' ce len'cu ri veng na'.

Kopti meuh a yeuh pon yeuh lheu' ka veng na', peue ka hkai' ka bhen' keute' na' ce baet ri meuneum huk'.”

<sup>4</sup> Hawc' ko', ui' pun ri mhawng' leukah' seubu neum kuing' pang ma' na', a lah',

“Peue Ui' na' pe', punta kaw pe' un' pun ri peus map' ka veng na',

mae' kaw pe' un' pun ri hkam' ku' keunhap' keuting ku' kaw meuh ri ka na',

pucti lih hk'ai' veng awn' a reu'.

<sup>5</sup> Kopti map' ka veng awn' jok' a ri huk' lhung' rot ri kuing' pang ma' na' hawc'.

Peucawo' Eun keutui' hpum' ku' kleuc' rai yeuh ka na' hawc'.

<sup>6</sup> Seun' ku' rai tawn tuil' ka ri peue na', tang tuil' a keutah ri ka reu'.

Ku' rai tawn yeuh ka na', tang tuil' a keutah ri ka lal' pun reu'.

Kawk' ku' tawn hkawo' ka ri tuil' peue nyui na', tang hkawo' a reng hk'ai' ka lal' pun reu'.

<sup>7</sup> Ku' yeuh pon yeuh lheu' ka ri tu' ri meun na' a lawn heun' a'neng ko',

kah ku' kuit nyhap' kleh'klai' na' kue' ri ka peunaw' yeut reu'.

A hpum' keuting lah' a nang hpum' ri na' meun,  
'Mok' ui' ri meuh nang'haw'hkam'. Ui' hkuin' meuh a'ya seunao.

Ui' hkuin' kaw laee duing kue' seunyi kuit nyhap' na'.

<sup>8</sup> Kop awn' na, hk'a'naee ti seunyi na' yawo ku' keunhap' keuting heun' ceu na' a kaw peueng' ri ing' lec veng awn' na.

A meuh hk'a' yeum, hk'a' kuit nyhap' mae' hk'a' ut' ngeup'.

Veng na' a kaw pun ri ha' hk'ue ri ngawl na',  
kopti Cawo' Peucawo' Cawo' taws' a'mu ka na' ti'ca keuting Eun na'."

*Peue loe' muk yam ri veng Babu'lon*

<sup>9</sup> Yam hkun'haw'hkam' bhen' keute' ku' len'cu, yeuh ku' yeuh pon yeuh lheu' ri veng na' nyu ce tu' ngawl ka veng ha' na', ce kaw kleh'klai' yam ri veng awn' na. <sup>10</sup> Kopti lhat' ce ri ku' tukhka ka veng awn' a na', ce cawng vang seungai na', ce lah',

"O', veng keuting Babu'lon

veng ti'ca keuting, pun mi hk'a' jha' hawc',

pun mi hk'a' jha' hawc'.

Hk'a'naee ti nali na' yawo, hk'a' taws' a'mu Eun Peucawo' na' rot a ri mi hawc'."

<sup>11</sup> Peue ka hkai' ka bhen' keute' na' ce kaw kleh'klai' yam ri veng awn' na, kopti kaw a un' laee kue' nang leuvaee hk'eung ce na'. <sup>12</sup> Hk'eung ce na' a meuh hk'il', leumuil, seumu seng', seng' seukleu', hpen' linin chak', hpen' yawtmong, hpen' nai',\* hpen' seurak' nyawk', hku' hom' ku ceu, hk'eung ku ceu pleng' ri neum nga keusang'

\* **18:12** 18:12 Hpen' nai' na' ti peue han' vaikong na' peue taing' a meuh hpen'.

na', hku' ngos heun', tong, lhec', seumu paing, <sup>13</sup> lho' cai'heung', hk'eung hom', ten tu' hom', hku' puis hom' muis Law'ban, leuum' pli' bui, lamawn hku' sanlon, hpun' moc', hkawocung', a'moe, kon'yung', rawng, law ka rawng, tu' peue mae' civit peue na'.

<sup>14</sup> Ce kaw lah', "Pli' ku' seumal sok mi na' pon a hk'ai' dak ti' mi heul' hawc'. Hk'a' meuneum na' mae' hk'eung yeuh mi sam'ran na' lu a gawm'euc' heul' hawc'. Mi hkuin' kaw laee pun ceu nang awn' ce keutah bae. <sup>15</sup> Peue ka hkai' ku' pun ri meuneum kopti paing' ce hk'eung nang veng awn' a na' kopti lhat' ce ri ku' tukhka ka veng awn' na, ce cawng vang seungai na'. Ce kaw kleh'klai' yam ri veng awn' na. <sup>16</sup> Ce lah',

'O' veng keuting, pun mi hk'a' jha' hawc', pun mi hk'a' jha' hawc'.

Chui'p' mi hk'eung hpen' linin chak', hpen' yawtmong mae' hpen' seurak' nyawk' na'.

Tu' mi na' a ceng' yhapyhap ri hk'il', seumu seng' mae' seng' seukleu' na'.

<sup>17</sup> Hk'a'nae ti nali na' yawo, hk'eung ngos heun' mi na' a lulaic heul' hawc'."

Ro' ka reu na' ce ku peue, peue pawk reu, peue yeuh kan' nang reu mae' peue yeuh kan' uii' a'yu ri ri mha'seumut' na' ce gawm'euc' ce kaw cawng vang seungai na'. <sup>18</sup> Yam nyu ce tu' ngawl ka veng ha' na', ce kaw klawng ri lah', "Tup duing kue' a veng seubu seun' veng keuting aen' na aw?" <sup>19</sup> Ce kaw sawng' ghuim' cing' ri na' ri peuluing. Ce kaw kleh'klai' yam ri veng awn' na. Ce lah',

"O', veng keuting, pun mi hk'a' jha' hawc', pun mi hk'a' jha' hawc'.

Kopti meuh a hk'a' meuneum ka veng na', cawo' reu nang mha'seumut' na' ce ku keut' ri meuneum ku peue ri.

Hk'a'naee ti nali na' yawo, mi pun ri lulaic heul' hawc'.  
<sup>20</sup> O', kuing' pang maou', cuinchang' ri veng aen' na reu'.  
 Peue Eun Peucawo', peue caee Eun Yesu' mae' peue  
 suip leukah' Eun Peucawo' na' pe' ren'kawn reu'.  
 Peucawo' taws' Eun a' mu ri veng awn' a tang' pe' hawc'."

*Veng Babu'lon rai' ka heul'*

<sup>21</sup> Hawc' awn' na, in'hpom ti'ca keuting na' eun nyon se-  
 umu keuteul seumu maw' keuting na' nang mha'seumut'  
 na'. Eun lah',  
 "Veng keuting Babu'lon na'

kaw a pun ri nyon ri tec ri reng seun' awn' na yeut.  
 A'nhaw' hkuin' kaw laee pun ri nyu a bae saec' ti  
 peue.

<sup>22</sup> A'nhaw' hkuin' kaw laee pun ri mhawng'  
 seng' htawm ce peue tet' ting', peue puing' pi' mae'  
 peue puing' pi'tae'rae' na' nang veng aen' na bae.  
 Hk'a' kan' na' ku ceu, a'nhaw' hkuin' kaw laee pun ri nyu  
 nang yeuh a nang veng aen' na bae.

A'nhaw' hkuin' kaw laee mhawng'  
 seng' maw' moc' nang veng aen' na bae.

<sup>23</sup> A hkuin' kaw laee kue'  
 ceng' ka kaw' ngawl na' nang veng aen' na bae.

A'nhaw' hkuin' kaw laee mhawng'  
 seng' kon'hk'ih' seula nang veng aen' na bae.

Peue ka hkai' mi na' meuh ce peue lhung' peue keuting  
 pang bhen' keute' na'.

Lo' mi kahta' na' mi yeuh peue kleuc' hk'a' ri  
 gawm'euc'.

<sup>24</sup> Nham' ce peue suip leukah' Eun Peucawo' na', nham' ce  
 peue Eun Peucawo' na'  
 mae' nham' ce peue pun ri hkam' toh peue ri pang  
 bhen' keute' na' ce gawm'euc', pun ri nyu a nang  
 veng awn' a."

## 19

### *Suk'seun' Peucawo' Eun*

<sup>1</sup> Hawc' awn' na, ui' pun ri mhawng' seng' laws' seun' seng' peue heun' nang kuing' pang mao' na'. A ta'ul' ri lah',  
“Halelu'ya,\*

hk'a' htut, munhpung' mae' ti'ca na' meuh a is' Eun  
Peucawo' e' na'.

<sup>2</sup> Kopti hk'a' taws' a'mu Eun na' a meuh neum mae' leupaws seumeu' na'.

Eun taws' a'mu ri beun' paing' tu' ri na' eun hawc'.

Beun' awn' yeuh eun bhen' keute' na' lu ri len'cu ri na'.

Peucawo' Eun yeuh beun' awn' eun sai' nham' ce mhai' ri na' hawc'.”

<sup>3</sup> Hawc' ko', ce tang ta'ul' ri lah',  
“Halelu'ya,

tu' ngawl ka veng awn' huk' a un' htawt' un' deut cot'cu ri.”

<sup>4</sup> Nang kawt lal'kul' pun' peue mae' ku' a'yu im' pun' tu' na' ce nghup' ri fae' Peucawo' mok' pang tenceo' na' Eun. Ce klawng ri lah',

“Amin, Halelu'ya.”

<sup>5</sup> Hawc' ko', seng' na' a laws' lih neum tenceo' na'. A lah',  
“Peue meuh mhai' Eun Peucawo'  
yumyam' Eun

peue aet' peue keuting na' ce gawm'euc',  
suk'seun' Peucawo' e' na' Eun reu'.”

<sup>6</sup> Hawc' ko', ui' tang pun ri mhawng' seng' laws' seun' seng' peue heun' na' mae' seun' seng' leuum' dhim' ri hot' klong' na' mae' seun' seng' neum hk'i reng na'. A ta'ul' ri lah',

“Halelu'ya,

---

\* **19:1** 19:1 Vangdoh' ka halelu'ya na' a meuh “suk'seun' Peucawo' Eun”.

kopti Peucawo' ti'ca keuting e' na' u'peung Eun.

<sup>7</sup> E' na' yeuh ri ren'kawn

maee' tuil' munhpung' Eun pawh,

kopti rot a yam Kon'yung' na' kaw Eun pen' hawc'

maee' kon'hk'ih' rangraen ri na' eun hawc'.

<sup>8</sup> Peucawo' tuil' Eun kon'hk'ih' na' eun cuip'

hk'eung hpen' linin chak', seunga' maee' yhapyhap  
na' hawc'."

(Vangdoh' ka hpen' linin chak' na' a meuh kan' leupaws  
seumeu' yeuh ce peue Eun Peucawo' na'.)

<sup>9</sup> Hawc' ko', in'hpom na' eun lah' a ri ui', "Tem' aen' a  
reu', 'Kah hk'a' ren'kawn na' kue' ri peue pun lhap' klawng  
eun ing' hk'a' chec' Eun Kon'yung' na' reu'." In'hpom na'  
eun tang lah' a bae, "Leukah' aen' meuh a taeng leukah'  
Eun Peucawo'."

<sup>10</sup> Yam awn' na, ui' nghup' ri kaw faee' eun maee' cung  
eun na'. Daecti eun lah' a ri ui', "Pawlaee yeuhko'. Meuh  
ui' mhai' Eun Peucawo' seun' mi ri maee' ec'awng' mi  
ku' jhawp' sa'hki' hkam' lawng Eun Yesu' na' yeut. Fae'  
Peucawo' Eun reu'. Kopti sa'hki' hkam' lawng Eun Yesu'  
na' meuh a meul' bhum' ka hk'a' sangsawn' leukah' mun'  
ren'kawn na'."

### *Cawo' pawk rawng paing*

<sup>11</sup> Ui' nyu kuing' pang ma' na' buih dah' ka. A kue'  
rawng paing ti tu' nanggal' ui' na'. Muis Eun Cawo' pawk  
ka na' a meuh Kati Keutawn' maee' Leupaws Seumeu'. Eun  
taws' a'mu maee' peueng' suik' ri hk'a' leupaws seumeu'  
na'. <sup>12</sup> Ngai' Eun na' a seun' kueng ngawl na'. Hk'a' pang  
cing' Eun na' a kue' cui'maw hk'il' heun' meul'. A kue' muis  
tem' ri ri tu' Eun na'. A lawn un' meuh Heun ri, a'nhaw'  
hkuin' yawng muis awn' na saec' ti peue. <sup>13</sup> Eun cuip' hk'o  
dal' cup ri nang nham' na'. Muis Eun na' a meuh Leukah'

Eun Peucawó. <sup>14</sup> Muk suik' ka kuing' pang maó ná ce hot' Eun heul'. Ce pawk rawng paing, ce cuip' hk'eung hpen' linin chak' paing seunga' ná. <sup>15</sup> Vaic lawm nyawk' ná a pucti lih hk'ai' moeng Eun ná. Eun ti vaic awn' na, Eun bhat' peue kuing' ná ce. Eun kaw u'peung ce ri hku'ji lhec' ná.† Eun kaw chok' chec' pli' bui ná hk'a'naee keutuí keuting a meuh vang bet' leuum' pli' bui seungeueng' Eun Peucawó tí'ca keuting ná. <sup>16</sup> Ri hk'o dal' maeé ri kleum' leuvang Eun ná, a tem' muis Eun ná yeuhki',  
 “Hkun'haw'hkam' hk'a'pang hkun'haw'hkam' gawm'euc'.  
 Cawó hk'a'pang cawó gawm'euc'”

<sup>17</sup> Hawc' ko', uí pun ri nyu in'hpom ti peue cawng eun hk'a'naee seunyi ná eun klawng ri lah' seng' laws' ri sim' peul' eo' nang vawo ná. Eun lah', “Ing' hk'om puri hk'a'naee pawe hk'asom' keuting Eun Peucawó ná reu'.  
<sup>18</sup> Punta kaw pe' pun ri hk'a keune ce hkun'haw'hkam', keune ce po' suik' maeé peue suik', keune ka rawng maeé peue pawk ka ná, keune ce peue gawm'euc' ná gawm' peue meuh mhai' ná maeé peue un' meuh mhai' ná, maeé keune ce peue aet' peue keuting ná.”

<sup>19</sup> Hawc' awn' na uí pun ri nyu sat' rai, hkun'haw'hkam' bhen' keute' ná ce maeé muk suik' ce ná ing' hk'om ce puri kaw peueng' Cawó pawk rawng paing ná Eun maeé muk suik' Eun ná ce. <sup>20</sup> Daecti sat' rai ná maeé peue guil ri meuh peue suip leukah' Eun Peucawó ku' yeuh het' hk'o'am' tang' sat' rai ná ka pun ri hkam' mheut' peue ri. Kopti meuh a het' hk'o'am' aen' a ná, eun cop'long peue kue' vang mhai' ka sat' rai ná, ce faeé ruphtu rup ka sat' rai ná. Sat' rai ná maeé peue guil ri meuh peue suip leukah' Eun Peucawó ná ka pun ri hkam' nyon tu' im' ri ná hk'uic' nang glu ngawl mat ná. <sup>21</sup> Peue kawn' vang ná ce yeum ri vaic pucti lih hk'ai' moeng Eun Cawó pawk

---

† 19:15 19:15 Suk'seun' 2:9

rawng paing na'. Hawc' ko', sim' na' ce cu ri hk'a keune ce peue awn' a.

## 20

### *Yam tiheng' neum*

<sup>1</sup> Yam awn' na, ui' pun ri nyu in'hpom lih eun neum kuing' pang mao' na' ti peue. Eun jhawp' pakhkeucae' ka keutong'nyarok rui' na' mae' mu' lhec' keuting na' ri ti' ri na'. <sup>2</sup> Eun mheut' ri mawt peuyong ku' meuh seueueng' leumah', meuh seuca', a'ko' meuh Satan na' rot tiheng' neum. <sup>3</sup> A lawn un' nang nuk hk'o' tiheng' neum ko', punta kaw a un' cang cop'long peue bae na', eun nyon a lih nang keutong'nyarok rui' na', eun sot saw' tawk' ta'ra' ri ka. A lawn nuk tiheng' neum ko', a kaw pun ri plo'e' ri ti cu hkao'.

<sup>4</sup> Ui' pun ri nyu ten na' ce. Peue mok' pang ten awn' ce meuh peue pun ti'ca kaw taws' a'mu na'. Hawc' ko', ui' pun ri nyu civit ce ku' taws' peue ngok ce na' kopti hkam' ce sa' hki' lawng Eun Yesu' na' mae' hkam' ce sa' hki' lawng leukah' Eun Peucawo' na'. Ce un' faee' sat' rai na', a'ko' ruphtu rup ka na'. Ce un' pun vang mhai' ka sat' rai na' ri rel' ri, a'ko' ri ti' ri. Peue awn' ce tang kuh' im'. Ce u'peung mae' Hkrit Eun tiduih' tiheng' neum. <sup>5</sup> (Peue seubu yeum na' ce, a lawn un' nang nuk hk'o' tiheng' neum ko', ce kaw un' nang kuh' im'.) Aen' a meuh tang kuh' im' pok nanggal' na'. <sup>6</sup> Peue pun ri pawng' ri hk'a'naee vang tang kuh' im' pok nanggal' aen' a na' ce mun' keuting, ce meuh peue seung' chak'. Ti'ca ka hk'a' yeum lal' pok ti pok na' a kaw un' kue' hk'a'pang ce. Ce kaw meuh peue jhawp' rit Eun Peucawo' mae' peue jhawp' rit Eun Hkrit. Ce kaw u'peung mae' Heun tiduih' tiheng' neum.

### *Satan lulaic*

<sup>7</sup> Yam tiheng' neum na' hawc' ka na', Satan na' a kaw pun ri ploé' ri hk'ai' vang hk'awng' ri na'. <sup>8</sup> A kaw heul' cop'long peue ut' pang bhen' keute' pun' hon' pun' cé' vang klawng ri meuh Gok maeé' Makok na' hk'awp'. A hk'on'ro peue kaw ing' peueng' suik'. Peue awn' ce heun' seun' sai keunam mha'seumut' na'. <sup>9</sup> Ce kaw ing' neum bhen' keute' na' ku hon'. Ce kaw ing' rop tawp ce peue Eun Peucawó' vang meuh veng leumeus' Eun na'. Daecti ngawl lih neum kuing' pang maó' na' a há' hk'ue ce gawm'euc'. <sup>10</sup> Seuca' rai cop'long peue na' a pun ri hkam' nyon ri hk'uić' nang glu ngawl mat vang sat' rai na' maeé' peue guil ri meuh peue suip leukah' Eun Peucawó' na' pun ka ri nyon ri ri ka nanggal' na'. Ce kaw pun ri hkam' hk'a' tukhka na' gawm' sum' gawm' seunyi cot'cu ri.

*Taws' a'mu ri peue yeum*

<sup>11</sup> Hawc' awn' na, ui' pun ri nyu tenceó' keuting paing maeé' Cawó' mok' hk'a'pang ka na' Eun. Yam puc Eun ri lih na', bhen' keute' maeé' maó' na' a rai'. A hkuin' laee kue' vang ut' pun ku' lal' ceu aen' na. <sup>12</sup> Hawc' ko', ui' pun ri nyu peue aet' peue keuting yeum heul' hawc' na' cawng ce nanggal' ka tenceó' na'. Htawm na' ce glas ri. Htawm seubu keuhti na' a ku glas ri, a meuh htawm civit im'. Peue yeum heul' hawc' na' pun ce ri hkam' hk'a' taws' a'mu na' hot' seun' ku' yeuh ri na' seun' ku' tem' ri nang htawm na' ce. <sup>13</sup> Mha'seumut' na' a tang tuil' peue yeum hk'a'naee ri na' ce keutah. Hk'a' yeum na' maeé' kuing' yeum na' a ku tang tuil' peue yeum hk'a'naee ri na' ce keutah. Peue ku peue na' pun peue ri hkam' hk'a' taws' a'mu na' hot' seun' ku' yeuh ri na'. <sup>14</sup> Hawc' ko', hk'a' yeum na' maeé' kuing' yeum na' a pun ri hkam' nyon ri hk'uić' nang glu ngawl na'. Glu ngawl awn' a meuh hk'a' yeum lal' pok ti pok na'. <sup>15</sup> A'nhaw' lawn un' kue' muis tem' ri nang htawm civit

im' na' ko', eun kaw pun ri hkam' nyon ri hk'uic' nang glu ngawl na'.

## 21

### *Kuing' pang mao' hk'u' mae' bhen' keute' hk'u'*

<sup>1</sup> Hawc' awn' na uí' pun ri nyu kuing' pang mao' hk'u' mae' bhen' keute' hk'u' na', kopti kuing' pang mao' nanggal' mae' bhen' keute' nanggal' na' rai' ka hawc'. Mha'seumut' na' a ku un' laee kue'. <sup>2</sup> Uí' pun ri nyu veng seunga' chak'. A meuh veng Yeru'salaem hk'u' ku' Peucawo' tuil' Eun a lih neum kuing' pang mao' na'. Veng awn' a pun ri rangraen ri uin' ri seun' kon' hk'ih' kaw pen' mhe' yong' ri ngam ko' me ri na' eun na'. <sup>3</sup> Hawc' ko', uí' pun ri mhawng' seng' laws' neum tenceo' na' a lah', "Maet' maen', vang ut' Eun Peucawo' na' lih ut' a mae' peue hawc'. Eun kaw ut' mae' ce. Ce kaw meuh peue Eun. Tu' Eun Peucawo' na' Eun kaw ut' mae' ce, meuh Peucawo' ce. <sup>4</sup> Eun kaw ot' ri tec leuum' ngai' ce na' ku jam ka. A hkuin' kaw laee kue' hk'a' yeum, hk'a' kuit nyhap', pet yam a'ko' hk'a' sui' na' bae, kopti hk'a' ku' hk'im' na' pon ka heul' hawc'."

<sup>5</sup> Cawo' mok' pang tenceo' na' Eun lah', "Buih pleng' Uí' ku ceu na' meuh ku' hk'u'." Hawc' ko', Eun tang lah' a bae, "Tem' ceu nang aen' a reu', kopti leukah' aen' leupaws seumeu' ka, a meuh ku' neum."

<sup>6</sup> Hawc' ko', Eun lah' a ri uí', "Hawc' ka hawc'. Meuh Uí' Alfa mae' Omega. Meuh uí' kleum' ka mae' ngoc ka. A'nhaw' lawn sum' nyui leuum' ko', Uí' kaw tuil' eun nyui leuum' neum keutui' leuum' civit im' na', eun hkuin' kaw tuil' ngos ka. <sup>7</sup> Peue pe na' eun kaw pun ri rap ri ti sin' aen' ce gawm'euc'. Uí' kaw meuh Peucawo' eun, eun kaw meuh kon' Uí'. <sup>8</sup> Daecti peue cang lhat', peue un' yum', peue rai, peue toh peue, peue hkuít' nawng'tang', peue yeuh kahta',

peue faee' ruphtu mae' peue cang chi' lai na' ce gawm' euc' vang ut' ce na' a meuh glu ngawl mat na'. Aen' a meuh hk'a' yeum lal' pok ti pok na'."

*Veng Yeru'salaem hk'u'*

<sup>9</sup> Hawc' awn' na, in'hpom a' res peue kue' paen' seug-long' ku' keunhap' keuting a' res ceu na' ce, ku' ti peue na' eun ing' lah' a ri ui', "Ing' maen', kaw ui' tuil' mi nawk kon' hk' ih' kaw meuh beun' Eun Kon' yung' na' eun."

<sup>10</sup> In'hpom na' eun va ui' hk'a' naee Cit' seunga' na' heul' ri gong keuting lhung' na'. Eun yeuh ui' nyu veng seunga' chak'. A meuh veng Yeru'salaem ku' Peucawo' tuil' Eun a lih neum kuing' pang ma' na'. <sup>11</sup> Veng awn' a ceng' yhapyhap ri munhpung' Eun Peucawo' na'. A ceng' seungung seun' ceng' ka seumu seng' ngos heun' na'. A seunga' seungawm seun' ceo' na'. <sup>12</sup> Veng awn' a kue' hkui keuting lhung'. Leuva' hkui ka na' a kue' kul' leual' leuva'. In'hpom kul' leual' peue na' ce ut' ri leuva' na' keuhti na' ti peue. Pang cing' ka leuva' na' a tem' muis ce peue ceu I' sarela' kul' leual' ceu na'. <sup>13</sup> Hk'a' lih seunyi ka na' a kue' loe' leuva', hk'a' tuh ka na' a kue' loe' leuva', hk'a' col ka na' a kue' loe' leuva', hk'a' lec seunyi ka na' a kue' loe' leuva'. <sup>14</sup> Hkui veng na' kleum' ka na' a meuh seumu kul' leual' meul'. Hk'a' pang ka kleum' ka na' a tem' muis ce peue caee Eun Kon' yung' kul' leual' peue na' ce ri ka.

<sup>15</sup> Punta kaw eun keutec veng awn' na mae' leuva' ka hkui veng na' a ci' keuting a' neng na', in'hpom ku' leukah' mae' ui' na' eun jhawp' lhem' hk' il' ku' keutec na'. <sup>16</sup> Veng awn' a kue' pun' ce' pun' nha'. Lung lang' lung neng' ka na' a keuteul puri. Yam in'hpom na' keutec eun veng na' ri ku' keutec ri na', a kue' timhuin' lal' heng' satadi\*.

\* 21:16 21:16 A meuh hk' ao 1,400 lak', a' ko' 2,200 ki' lo'

puri. <sup>17</sup> Eun keutec lung leupeul† ka hkui veng na' a kue' tipak' pun'kul' pun' sok'. In'hpom na' eun keutec a seun' peue keutec peue na'. <sup>18</sup> Hkui veng na' a go' ri ri seumu seng' seurak'. Veng na' a pleng' ri neum hk'il' un' laee hkawo' keunhaw' na'. A seunga' seungawm seun' ceo' na'. <sup>19</sup> Kleum' ka hkui veng na' a yong' ri ri seumu seng' ngos heun'heun' ceu na'. Kleum' keuhti ka na' a yong' ri ri seumu seng' seurak', kleum' leual' ka na' a yong' ri ri seumu seng' lheun', kleum' leuoé' ka na' a yong' ri ri seumu seng' seungal puil', kleum' pun' ka na' a yong' ri ri seumu seng' seungal lawng, <sup>20</sup> kleum' hpawn' ka na' a yong' ri ri seumu seng' seurak' lai, kleum' les ka na' a yong' ri ri seumu seng' heun' hpiu', kleum' a' res ka na' a yong' ri ri seumu seng' seungal pah', kleum' seudi' ka na' a yong' ri ri seumu seng' seungal hk'ao', kleum' seudim' ka na' a yong' ri ri seumu seng' lheun' hk'ao', kleum' kul' ka na' a yong' ri ri seumu seng' seungal kueng, kleum' kul'keuhti ka na' a yong' ri ri seumu seng' seurak' seun' yil, kleum' kul'leual' ka na' a yong' ri ri seumu seng' yawtmong na'. ‡

<sup>21</sup> Leuva' ka hkui veng kul'leual' leuva' na' a meuh seng' seukleu' kul'leual' meul'. Leuva' ti leuva' na' a meuh seng' seukleu' na' ti meul'. Hk'a' ka veng na' a pleng' ri neum hk'il' un' laee hkawo' keunhaw' na'. A seunga' seungawm seun' ceo' na'.

<sup>22</sup> Ui' hkuin' nyu nya hk'o' mun' keuting na' hk'a'nae veng awn' na, kopti Peucawo' Cawo' ti'ca keuting na' Eun maeé' Kon'yung' na' meuh Ka nya hk'o' mun' keuting ka veng na'. <sup>23</sup> Veng awn' a hkuin' lo' ceng' ka seunyi na', a'ko' ceng' ka a'chi' na', kopti mun'hpung' Eun Peucawo' na' meuh a ku' ceng' ka veng na', maeé' Kon'yung' na' Eun meuh kaw' ngawl ka veng na'. <sup>24</sup> Peue ceu na' ce kaw long

† 21:17 21:17 A'ko' lung lhung' ‡ 21:20 21:20 Seumu seng' aen' ce a hkuin' koe duih' muis ka na'.

hk'a' hk'a'naee ku' ceng' awn' na. Hkun'haw'hkam' bhen' keute' na' ce kaw sawng' ti munhpung' ri na' ing' lec veng awn' na. <sup>25</sup> Leuva' ka veng na' a hkuin' laee sawng' ri, kopti mawn' na' un' laee kue' a yam peunsum'. <sup>26</sup> Munhpung' mae' hk'a' yumyam' ce peue ku kuing' na' a kaw pun ri ti ri ing' lec veng awn' na. <sup>27</sup> Ku' hk'aw'jeuk na', a'ko' peue yeuh ku' hk'o'kaic na', a'ko' peue cang chi'lai na' ce hkuin' kaw cang ing' lec veng awn' na. Daecti peue kue' muis nang htawm civit im' Eun Kon'yung' na' ce yawo ce kaw pun ri lec a.

## 22

<sup>1</sup> Hawc' awn' na, in'hpom na' eun tuil' ui' nawk klong' kue' leuum' civit im' seungá seungawm seun' ceo' na'. A lhaee' lih neum tenceo' Eun Peucawo' na' mae' tenceo' Eun Kon'yung' na'. <sup>2</sup> A lhaee' lec nang ngon' ka hk'a' keuting ka veng na'. Keunam hk'a'mawn' hk'a'maen' ka klong' na' a kue' kleum' hku' civit im'. A pli' pli' kul'leual' ceu, chi' ka ti pok. Lha' ka na' a meuh bai' yeuh peuyhat peue cuin. <sup>3</sup> A hkuin' laee kue' hk'a' jha' na' bae. Tenceo' Eun Peucawo' na' mae' tenceo' Eun Kon'yung' na' a kaw uin' ri nang veng awn' na. Peue yeuh mhai' Eun na' ce kaw yeuh mhai' Eun. <sup>4</sup> Ce kaw pun ri nyu buh Eun, muis Eun na' a kaw tawk' ri ri rel' ce na'. <sup>5</sup> A hkuin' kaw laee kue' peunsum' na' bae. Ce hkuin' kaw laee lo' ceng' ka kaw' ngawl na', a'ko' ceng' ka seunyi na', kopti Cawo' Peucawo' kaw Eun tuil' ku' ceng' na' ri ce. Ce kaw u'peung a heul' cot'cu ri.

### *Hkrit kaw Eun lih*

<sup>6</sup> In'hpom na' eun lah' a ri ui', "Leukah' aen' leupaws seumeu' ka, a meuh ku' neum. Cawo' Peucawo' cit' ce peue suip leukah' Eun Peucawo' na' cus' Eun in'hpom ri na' eun lih yeuh mhai' ri na' ce nyu ku' un' ling' a kaw

kah ri keut' kue' na' ce. <sup>7</sup> Keue' reu', un' ling' kaw Ui' lih. Mun' keuting ri peue leuceng ri ti leukah' tamnai tem' ri hk'a'naee htawm aen' a na' ce reu'."

<sup>8</sup> Meuh ui' Yo'han ku' pun ri nyu pun ri mhawng' lawng aen' a na' eun. Hawc' pun ui' ri nyu pun ui' ri mhawng' lawng aen' a na', ui' nghup' ri kaw faee' in'hpom ku' yeuh ui' nyu a na' eun mae' cung eun na'. <sup>9</sup> Daecti eun lah' a ri ui', "Pawlaee yeuhko'. Meuh ui' mhai' Eun Peucawo' seun' mi ri mae' ec'awng' mi ku' meuh peue suip leukah' Eun Peucawo' na' mae' peue rokso' leukah' tem' ri hk'a'naee htawm aen' a na' ce yeut. Fae' Peucawo' Eun reu'."

<sup>10</sup> Hawc' ko', eun tang lah' a ri ui', "Pawlaee tawk' ta'ra' ri leukah' ce peue suip leukah' Eun Peucawo' ku' tem' ri hk'a'naee htawm aen' na awh, kopti yam ka na' kaw a hk'aws' rot hawc'. <sup>11</sup> Peue yeuh ku' kleuc' na', taé' ce suip ri yeuh ku' kleuc' na' heul'. Peue yeuh ku' rai na', taé' ce suip ri yeuh ku' rai na' heul'. Peue yeuh ku' cawp' na', taé' ce suip ri yeuh ku' cawp' na' heul'. Peue seunga' chak' na', taé' ce suip ri rokso' tu' ri na' seunga' chak' heul' reu'.

<sup>12</sup> Keue' reu', un' ling' kaw Ui' lih. Lapsawng' Ui' na' kue' a ri Ui'. Ui' kaw tuil' a kuing'hpaw mae' hot' ku' yeuh peue na' ku' peue ri. <sup>13</sup> Meuh Ui' Alfa mae' Omega. Meuh ui' kleum' ka mae' ngoc ka. Meuh ui' kleum' yamla na' mae' yam tisut' na'.

<sup>14</sup> Peue sawng' sak hk'ohk'eung ri na' punta kaw ce pun ri hk'a' pli' ka kleum' hku' civit im' na' mae' kaw ce pun ri lec leuva' na' ing' lec veng na', mun' keuting ri ce. <sup>15</sup> Ku' ut' hk'a'nok ka veng na' a meuh so', a meuh peue yeuh kahta', peue hkuit' nawng'tang', peue toh peue, peue faee' ruphtu mae' peue ren' mae' chi' lai yeuh ri hot' a na' ce ku' peue.

<sup>16</sup> Meuh Uí' Yesu'. Uí' cus' in'hpom ri ná' eun lih hkam' sa'hki' lawng aen' ce ri pé' pun muk kon' Hkrit ná' ce. Meuh Uí' res maeé' ceucat eun Davit'. Uí' ku meuh seumeueng' keuting peunngup cawo ceng' nyawk' ná' yeut."

<sup>17</sup> Cit' seunga' maeé' Kon'hk'ih' kaw pen' ná' Ka lah', "Ing' maen'." Saec' meuh peue mhawng' a ná' kah ce lah', "Ing' maen'." A'nhaw' lawn sum' nyui leuum' ko', kah eun ing' maen'. A'nhaw' lawn sum' pun ko', kah eun ing' ti lapsawng' un' tuil' ngos ri leuum' civit im' ná' maen' reu'.

<sup>18</sup> Tuil' Uí' sati ce peue pun ri mhawng' leukah' tamnai tem' ri nang htawm aen' a ná' ce. A'nhaw' lawn baeé' a lheu' ko', Peucawo' Eun ku kaw baeé' ku' keunhap' keuting ku' tem' ri nang htawm aen' a ná' ri heun.

<sup>19</sup> A'nhaw' lawn ti leukah' tamnai tem' ri nang htawm aen' a yawm' ko', Peucawo' Eun ku kaw ti ku' htuk' eun ri kaw pun ri kleum' hku' civit im' ná' maeé' ri veng seunga' chak' ku' tem' ri nang htawm aen' a yawm' yeut. <sup>20</sup> Cawo' hkam' sa'hki' ri lawng aen' ce ná' Eun lah', "Un' ling' ko', kaw Uí' lih neumneum." Amin, Cawo' Yesu' lih reu'.

<sup>21</sup> Kah mun' sin' Eun Cawo' Yesu' ná' kue' ri peue Eun Peucawo' ná' ce reu'.

**Plang**  
**The New Testament in the Blang language of Myanmar**

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

---

PDF generated using Haiola and XeLaTeX on 19 Oct 2021 from source files dated 14 Jul  
2021

0468b0b5-acb2-59c4-92d3-4fa09a4d091c